



帶經堂集卷八十五

歙門人程哲校編

新城王士禎貽上



蠶尾續文十三

墓誌銘

誥授奉政大夫順天府治中調補兩浙鹽運

司運副錦秋李公墓誌銘

子輿氏有言所謂故國者非有喬木之謂有世臣
之謂也予謂不盡於此所謂故國者有老成典刑
之謂也大雅蕩之什曰雖無老成人尚有典刑老
成人者國之文獻徵焉掌故存焉利害衷焉風俗
為之厚頌懦為之立焉匪細故也若吾鄉錦秋先

生所謂老成典刑非歟先生李氏諱鴻雷字仲默
錦秋其別字其先自長山徙新城曾祖九青多隱
德享年九十祖進孝稱李長者享年八十有五父
采蘭諸生益好行其德享年九十有五 誥封奉
政大夫丈夫子三人伯鴻震諸生享年九十季鴻
靈順治辛丑舉禮部康熙甲辰 賜進士出身歷
官沅江知府先生仲也生而端方嚴介總角能文
章九歲赴試泰安州父執易其少也試以經義立
就語多警策咸嗟異稱聖童十二補諸生時文競
尚諸子其甚者旁及釋典凡南華楞嚴華嚴諸經

皆供漁獵先生心非之獨究心二程遺書朱子語
類爲文一根於理甫弱冠已稱大師崇禎壬午舉
山東鄉試 世祖皇帝定鼎急人才徵甲乙科赴
選人順治二年乙酉授隨州知州隨漢東大郡數
更闖獻之亂城市爲墟濮州南生魯洙源爲楚轄
問先生曰隨凋瘵極矣子往何以爲政先生對曰
布寬大以集流亡嚴警備以弭盜賊其健訟者必
懲主使以絕根株遺黎其有多乎南公曰善莅隨
未幾闖賊餘孽一隻虎者擁衆數千將犯隨城虛
無人衆請避山砦而以城委賊先生毅然不可率

家人胥役閉門登陴發巨礮賊方狐疑進退未決
會援兵至遂遁去隨城以全人始有固志未期年
盜賊革面流亡漸復汙萊漸闢速訟者咸悔艾爲
良人於是修復學校日進諸生講濂洛關閩之學
三年報最中丞御史交薦戊子擢順德府同知時
天下初定畿南列郡尚多伏莽會姜瓖以大同叛
南趨并汾河東大震邢州距三晉數舍日夜纂嚴
先生身任城守露宿睥睨樓櫓間不遑內顧又嚴
牌甲譏出入使間諜不得逞如是者累月姜瓖平
始解嚴總督尚書張忠勤公能仁亟稱其功署任

縣事均徭役清逋賦吏不敢上下其手舊令候代
者三人皆遣之歸遶城壕塹植柳萬株人比於召
伯之甘棠時湖南方用兵禁旅日出大名其養馬
地也凡大軍所需餼糧芻茭扉屨槽棧之屬取辦
於直隸河南山東道里遼闊不能時至當事者又
多畏避不敢前滿漢之情不通往往譟於轅門制
府苦之亟召先生計事對曰前此之弊約略有數
端立營之所兵民雜處易於生事一也各屬解饟
往往不時至兵有庚癸之呼二也運官畏旗軍屯
糧之地往往去營闊遠軍苦轉運三也事關三省

而司其事者不過府廳以下權輕而威令不行四也制府曰子往矣是無踰子者先生曰某固言之矣三省之事一府佐何能為制府曰假子旗牌如吾自行又戒閹吏曰李郡丞代吾理軍需朝至朝以入夕至夕以入先生乃諾而出言於制府豫請主兵者移知旗軍清冊勾稽糧草之數豫示以期某日某旗領某所糧草仍令丁夫如約運至軍營不數日而畢事禁旅無譁者制府勞先生曰古人左畫員右畫方不過如此矣壬辰遷順天府治中先是先生守隨秩滿當遷尉薦之多無出其右者

例得超擢監司太守上官謂先生曷稍委蛇就吏部主者謀之先生不可曰廉吏顧安所得錢至是又秩滿當遷郡守先生復持正不屑詭遇僅遷治中以去人多為先生惜之則笑曰以龐士元所不能得而吾得之尚何不足之有甲午以順天鄉試收卷舛誤應下吏議而舛誤實在推官監試御史謂先生曰君代他人受過但具一文辯明受事月日吾為具疏事立解矣先生謝曰與人共事數載一旦涉利害輒反脣相稽君子不為也御史歎服以為長者丙申左遷兩浙鹽運司運副代覲入都

疏陳遷海界已來商竈不便者數事雖格於部議識者韙之署海寧縣事海寧浙西望縣舊逋積數萬前令率預徵新稅為那移補苴之計先生曰是非良法也乃奏記方伯請自今歲十月迄來歲四月奏銷之期祇徵舊逋五月後新絲新穀既登始徵新稅民力未絀而新舊不至相奪五年之逋可次第而畢策無便於此者方伯曰善行之期年而效前令之候代者皆歸南米積弊解役與歇家潛通糧道胥吏造作假批以完為欠前令不察往往徵解至再三民無所告訴先生廉知之乃定為官

收官解之法刻石縣治吏役不得復肆其奸每歲漕糧官胥居為奇貨旗軍挾之恣其需索莫敢誰何先生力除其弊絲毫無所染指旗軍斂手奉法比代歸不名一錢海寧膏腴之地甲杭諸邑而先生處之澹然清操益勵人以為尤難尋署嘉湖道事值歲稔而禾郡市河久湮塞商賈不至先生乃力任濬河而設粥廠於河干飢民就食者因而募之咸踊躍趨事閱月河工告成民無流冗商賈復通先生之幹濟皆此類也壬寅以閩餉解不及額罷歸巡撫已下惜先生才將特疏題留先生不可

三石在の
三石在の
曰兩親年踰七十恒思歸養而苦限於例今獲省親膝下幸矣敢復戀此雞肋耶歸田三十餘載布衣蔬食坦步當車弟沅江君官郎署長子嗣真以庚子領解丁未成進士家門方鼎盛而門庭蕭寂不啻單素晨夕定省而外出則課耕田間與蓑笠爲伍入則危坐讀書不爐不扇若未嘗從大夫之後者然縣有大徭役大利害必援據典故侃侃爲長吏陳之縣處章鄒淄長諸水下流歲罹水患先生著平心說巡撫中丞桑公采而行之西北水患得以漸甦此先生爲德於鄉之大者予嘗論之先

生廉吏也仁人也廉而不劌故其行一本於忠厚而不爲谿刻仁而有勇故平居退然自下一旦投之以艱鉅而不畏不疑里居言行皆可師法以身爲鄉之文獻者數十年古所謂三老五更者也老成云亡典刑日遠能不爲人心世道之憂乎生以萬曆甲寅六月十五日卒以康熙三十四年乙亥十二月十五日享年八十有二積階至奉政大夫元配高氏長山人也莊靜勤儉與先生同德事舅姑以孝佐夫子以儉教諸子以嚴撫臧獲以慈終身不御紈綺不知金翠之飾身旣貴猶躬操井臼

三石九石
至於白首生以萬曆甲寅九月初六日卒以康熙
四十三年甲申四月十九日享年九十有一累封
宜人子六人嗣真順治庚子解元康熙丁未進士
卒嗣貞歲貢生候選訓導卒嗣慎卒嗣恭增生嗣
讓增生嗣武庠生女一人適增生何毓光孫七人
德洽增生德祺德祥德寬德宣俱庠生德祚卒德
泌孫女十三人曾孫七人依謙依訓依訪依諧依
信依中依禮曾孫女七人五世孫一人廷芳五世
孫女一人先生以康熙己卯十月十日葬潘孟店
祖兆而隧道之石闕焉今以高宜人祔實丁亥十

二月二十四日銘曰

昔有先正兮言明且清猗嗟先生兮國之老成國
之老成兮世為典刑掌故攸稽兮文獻足徵天不
憖遺予梁木以傾丸丸松柏兮棲神之庭東王西
母兮體魄攸寧九原可作予先民是程

墓誌銘

鄭子皮死子產哭之曰吾已矣無與為善矣古賢
士大夫砥志節厲廉隅身在朝廷之上則危言危
行退居里閭則不言而躬行使其長吏有所矜式

三五六十一
其子弟有所勸而為善有所畏而不敢為不肯流
風餘韻猶將百世師之而況於親炙之者乎此吾
於翰林唐先生之歿而不禁子產之悲也按狀先
生諱夢賚字濟武別字豹岳其先以軍籍來淄川
曾祖思仁祖士卿父曰俞字彥開名儒也先生幼
穎悟以父為師童子時私學為古文鄉先生刑部
侍郎高公珩見而奇之曰異日當以文章名世弱
冠舉順治五年鄉試明年舉禮部 賜同進士出身
改庶吉士八年授秘書院檢討會 命翰林院譯
文昌化書先生慨然曰此非聖之書豈可塵 乙

夜之覽乃具疏大略以為曲說不典無裨聖化請
移此以輯聖賢經世大訓以佐平明之治疏入留
中九年請急歸葬行有日矣會御史張某以外補
上疏反噬干重典給事中陰某壽張為幻押閣其
間先生惡之上疏糾給事中忤要人意遂罷歸下
文通公永吉過先生曰此固吾輩意中事也愧公
勇決多矣於是李詹事呈祥蘇給事文樞諸編修
豫各有疏直先生而先生徑拂衣歸先生之歸也
年未三十侍兩親就養無方審燥溼問燠寒終身
無欠伸跛倚視異母弟夢師如手足疾痛苛癢恒

三万九十四
與共之爲營別墅而代任其租賦鄉人化其德慕
侍郎高公之爲人遂卜鄰焉布衣芒屨相與嘯咏
溪山之間里中稱曰二老居恒讀書稽古講伊洛
關閩正學以其餘旁通二氏凡柱下西竺微言奧
義皆能窮其指歸發爲文章世間世出左右逢原
若懸河決溜一息千里而莫之能禦也論詩以蘇
陸爲宗跌宕排冪上軼旁出予嘗序之以爲其文
近於蒙莊其詩近於東坡識者亦不以予言爲妄
也旣以大宅讓其弟而卜築城之東南隅王樵繭
室舊地中有志壑堂林臯閣畫餘亭莊山書屋地

縱橫不數十笏修竹高梧曲折蔽虧小山曲池透
迤映帶先生自爲賦以道其意又仿雲棲放生池
遺式於城西傅家灣二水匯處作放生磯數里上
下網罟絕跡與高公賦詩刻石以垂永久先生雖
蕭然世外而不忘經濟著銅鈔疏禁糴說備邊策
皆鑿鑿可見施行尤加意桑梓如議革簽報櫃書
籌省漕糧折解免西郭義集起稅皆請於縣令力
舉行之縣人食其利者二十餘年中年遊廬阜龍
眠浮渡下姑蘇泛濤江登嚴陵釣臺登臨之餘或
爲道人裝攜一杖施藥於市人不知其故史官也

三萬九千の
客武林同年林副使嗣環前已客死有子壯不能
娶先生傾橐為營葬授室手錄其遺集以歸平生
高義多此類雅好汲引後進經其指授率成名士
取科第如蘇元行譚再生楊萬春輩甚眾先生篤
於朋友數百里巾車往返不以為勞予乙丑夏以
祭告歸自東粵先生與高公訪予西城別墅夜涼
坐石帆亭劇談江東西山水丙夜不休丙子秋復
以祭告歸自秦蜀高公已老病先生獨訪予御
書堂流連投轄三日不忍別先司徒先夫人之喪
先生不遠百里所以弔唁之甚至先兄考功之器

先生哭寢門極哀予兩服闋詣京師先生先期過
予上下千古凡經世出世經史百家之學無不往
復極論嗚呼世豈復有如此人哉在禮有之曰州
閭鄉黨稱其孝兄弟親戚稱其慈執友稱其仁
交游稱其信于先生備之矣先生襟情曠達預營
生壙煥山之陰侍郎高公為之誌所著志壑堂集
二十四卷後集八卷選集十四卷則予所論定也
又濟南府誌二十四卷淄川縣誌八卷借鶴樓小
集二卷林臯漫錄若干卷生明天啓丁卯十二月
八日卒康熙三十七年戊寅六月十六日元配畢

三才圖會
皇朝經世文編卷十三
氏有壺德 皇贈孺人繼配焦氏戶部左侍郎毓
瑞之妹子一人行學歲貢生侯補京職女一人適
范祖光孫一人伯珍以其年十二月二十一日葬
來請銘銘曰
惟昔君陳惟孝友于兄弟克施有政先生之出官
為詞曹而著名諫諍先生之處令德孝恭而不忘
利病學兼二氏而著書立說必軌乎先聖文擅作
者而感物吟志必晰乎雅鄭鄉國典刑人倫水鏡
身則已矣名則益夙後之人過丘墓而式之曰我
有先正

誥授朝議大夫福建分守督糧道布政使司

叅議慙蓼劉公墓誌銘

公劉氏諱深字源長別字慙蓼世為淄川人曾祖
爵祖冠父鼎鉉公幼從父學無他師年十六出應
童子試督學鄞人錢君清溪試以經義三篇頃刻
立成文采斐然大奇之補縣學生宣城施愚山侍
讀以僉事來督山東學六郡英九之士甄拔無遺
賞公文以為蕭疎簡遠拔冠其軍順治庚子省試
主者將以公首解既而以新城李嗣真作元同經
房移置第六李君公受業弟子也榜發傳為盛事

康熙甲辰嚴我斯榜 賜同進士出身癸丑銓授
香河知縣香河密邇京師地久為八旗屯牧其民
皆宗室佃人公嚴立科條不畏強禦旗人凜然亡
骫法者縣西四十里為河道通津會滇閩作逆
朝命禁旅往討浮戈船南下公慮民失農時且不
任挽送之苦多方籌畫募市井丁壯代之事嚴而
民不知役治香河三年惠政不可殫紀民尸祝之
比於畏壘擢行人司行人康熙庚午典廣東試得
梅遇夫等四十三人拔潘君履生於廢黜之中士
論服之辛未考選臺諫 特簡湖廣道監察御史

公之官行人也與陽羨任葵尊弘嘉居同邸舍出
入共一肩輿不謁權要不通賓客茗椀罍熏討論
經史相對晏坐終日而已至是兩人同授御史任
君章數十上而公言不妄發務鎮靜持大體尤不
樂搏擊為名高時司農籌餉頗開事例賈人子
入貲或加至一二品每朝期章服爛然尊卑亡等
公上定品級以崇國體疏下部議言雖不行識者
韙之甲戌外補福建布政使司叅議督糧儲閩海
疆也將軍已下提鎮綦布滿漢兵戍守者八萬有
奇胥待哺焉公殫心經理給無後時嚴絕扣剋積

三才子
登岸紀文卷十三
十一
弊軍皆宿飽馬騰於櫪林某者有瑩地一區為豪
民兼并前讞者多入其賄不與直最後赴愬於公
公親履畝得斷碣田間披蘚繹之果林氏祖墓也
遂以地歸林而置豪于法凡其虛公明斷皆此類
未幾引年乞休歸林居數載不飾輿馬不入州府
長吏罕覩其面可以厲士風敦薄俗禮所謂歿而
可祭於社者公其人與生天啓丙寅閏六月初三
日卒康熙四十二年癸未十二月二十九日享年
七十有八階朝議大夫歷官湖廣道監察御史福
建布政使司參議元配翟氏封孺人性嚴毅有烈

丈夫風公宦游四方孺人獨操家棟未嘗之官督
治田園勸課紡績歷年賦稅不待追呼而畢率取
給于家而不仰給于官故有以成公之廉正教子
讀書取友皆為名士師巫尼媪罔敢履闔生天啓
甲子十二月二十五日卒康熙四十六年丁亥七
月初九日享年八十有四子男子三人肇徐縣學
增廣生肇昌縣學廩膳生壬午副榜肇祉早殤
女子四人傅思明韓貞吉王朝相高之隲其壻也
孫男二人紹祖繩祖孫女四人以丁亥冬十一月十
七日葬縣城東北之田家莊肇昌從予游來請

三
銘銘曰

鄉之善士國之寶臣仁而不鷲為時鳳麟六廉四知砥操松筠三德六行燕詒子孫峨嵋德配敬姜比倫耆壽偕老蘭玉誥誥黷山嶙峋孝水清淪封如馬鬣松作龍鱗不騫不崩裕爾後昆

誥贈光祿大夫刑部陝西清吏司主事御之

宋公墓誌銘

順治癸巳甲午間予為孝廉始出交天下士與吳郡諸子通縞紵之好時則三宋為之職志三宋者御之先生及其兩弟文恪公右之孝廉疇三也明

年乙未予上公車與文恪同舉禮部而疇三暨雲客既庭茗文原一公肅甫草皆湊京師後二十三年丁巳而御之始舉京兆又二十年丙子予以祭告西嶽再使關隴公冢子僉憲君適知商南縣與予為城南之遊信宿樊川敘述疇昔欣慨交心又十年而僉憲持節來濟南以公誌墓之文請回憶訂交之初已五十餘年而予亦耄及之矣其何忍不銘按狀公名宓初名德寬改名德宸最後改今名字御之別字儉齋世為蘇之長洲人高祖純仁南京刑部山東司郎中曾祖道明太學生祖琦諸

生 皇贈資政大夫兵部尚書父學朱崇禎辛未
進士監察御史出按山東戊寅殉節死卹贈大理
寺卿 皇贈資政大夫兵部尚書公其冢子也少
與兩弟讀書家塾已露頭角十四補諸生會侍御
公殉節訃聞公哀號奔赴崎嶇戎馬間比達濟南
兵亂後暴骨如莽公以孤童晝夜行求哀動行路
及終不得乃招魂返葬江南人稱篤孝家難之後
風雨漂搖公與兩弟入而侍母出持門戶以其隙
下帷聚書讀之兄弟自相師友文名藉甚吳越之
士珠槃玉敦交錯於道衣冠文物之盛傾動東南

順治戊子辛卯兩弟相繼捷去公喜曰是可以承
先志慰吾母矣不以己之不遇而有愠色乙未文恪
成進士留京師疇三南歸未抵里而太夫人病終
於家公子然獨治後事必誠必信勿之有悔先是
公文章與兩弟齊名已而文恪官禁近日益通顯
疇三早歿而公數奇不遇丁巳始舉於京兆則公
已老矣甲子畿輔災時僉憲君知真定之臨城公
質產得千金公車攜之而北過臨問民逋尚六七
百金公出橐中裝命僉憲代完之戒勿責償臨人
皆感泣瀕行語僉憲曰今歲饑來春且艱食憂未

艾也吾橐中尚餘金三百當悉留備賑民食新麥
乃已僉憲謹受教全活者數千人臨之父老子弟
感公恩德為立祠請於上春秋祀焉嗚呼以公之
文學才略使得早達自奮於功名之會必能廉平
清靜以經術潤飾吏事使民安其田里亡怨苦愁
恨之心如兒寬董仲舒之為者而僅小試於臨城
之一邑是可歎也丁亥之秋濟東諸郡縣大水歲
稔僉憲立為請命請蠲不已重以請賑夫亦猶繼
公之志也莊子書稱庚桑楚居畏壘之山三年而
畏壘大穰其民相與尸而祝之社而稷之公身雖

不遇而能以臨與濟之民為畏壘亦既尸而祝之
社而稷之矣又何憾哉公居鄉里恭謹儉約不啻
後門寒素文恪嘗曰吾仕宦三十年常懼得罪鄉
鄙能助成之者吾兄力也是可以知公已矣公少
以文章風義知名江左晚歲家居四方人士負笈
從遊者益衆予不具論論其利濟及人之大者使
後之人知公有用世之才而終其身不獲一遇為
可惜而區區文藝之末不足以盡公也所著存笥
稿四卷玉壺堂詩集六卷藏於家生以天啓乙丑
八月初九日卒以康熙丙寅十二月初二日得年

六十有二元配管氏遇 覃恩例封文林郎直隸
 真定府趙州臨城縣知縣妻封孺人辭不受 誥
 贈光祿大夫刑部江西清吏司主事妻封一品太
 夫人子男子三人廣業即僉憲君見任分守濟東
 道兼理通省驛傳山東按察司僉事定業浙江紹
 興府知府嗣為疇三公後紹業安陽縣知縣子女
 子四人一適己卯舉人吳諶一適教諭葉舒球一
 適教習江之訓一適太學生金之法撫疇三女一
 人適教諭丁棟孫男六人志益候補主事師曾戶
 部陝西清吏司郎中志蔓候補主事志契候選訓

導志尹志祁俱太學生曾孫四人允熙允文允恭
 允讓以某年某月某日葬某阡系之銘曰

應龍乘雲霖雨天下叶 戢翼淵潛而活彼涸鮒房
 子之人伏臘奉祠公之神氣則無不之

誥授朝議大夫提督廣東學政按察使司僉

事赤山于公墓誌銘

公于氏諱覺世字子先別字赤山其先文登人有
 仲德者徙新城是為新城始祖三傳至璧中順天
 壬午鄉試歷官福建道監察御史巡按河南湖廣
 以廉直聞官至苑馬寺卿曾孫承慶知武安縣公

三百七十五
曾祖也太學以讚公祖也贈朝議大夫振翼是為
公父朝議大夫五子長維世博物負奇氣一時名
士交推讓之公稍後出與之齊名中順治三年丙
戌鄉試乙未舉禮部尋丁外艱己亥 賜進士出
身授歸德府推官未幾奉裁改知巢縣縣古居巢
帶山瀕湖號難治公為政寬簡間以嚴劑之獄訟
衰止俗好巫尚鬼壬子冬縣人數夜驚晨起則院
中多得瓦石民間競為祈禳公曰此奸人所為何
城狐社鬼敢爾乃下令嚴緝三日而獲其作奸者
某某置諸法人心乃安庚戌江北饑居巢尤甚公

捐俸錢購米以食飢者存活數萬人明年蝗公齋
戒祭禱遂不入境巢人頌之癸丑滇寇發難 親
王帥大兵入楚休士馬於廬州糗糧芻茭屢屢咄
嗟取辦太守走匿他所曰是非巢令不可檄公至
悉以委之公立啓於 王戢禁旅勿譁出則頤指
口畫日中皆集無後時者按籍而給之王大喜禁
旅皆悅既歲事太守謝曰微公才略不及此有巨
寇宋標者抵巇起安廬間衆數千人攻剽郡邑將
據焦湖為窟穴揚帆自大江東下公偵知之設伏
於南門浮橋而身率甲士邀擊之甫接戰伏發殲

其眾魁就禽上功幕府餘黨皆烏獸散安廬之盜
遂絕根株公之力也內遷刑部主事歷員外郎遷
禮部郎中辛酉奉命典試兩浙得人為盛明年
壬戌蔡君升元狀元及第即公門下士也尋出視
學廣東東粵當兵燹之後廟學多圯敗公首請於
督撫疏請修葺得旨允行其教士先德行後文藝
士翕然化之瓊州遠在海南前學使多憚風濤不
至公叱馭而往舟至中洋颶風作舟中人皆恐俄
有小鳥狀如鸚鵡來集檣上舟人懼譟徑渡得無
恙論文之暇廉問忠孝節義關教化者悉旌之三

年報最擢布政使司參議需次歸以繼母王太恭
人春秋高絕意仕進晨夕定省寢門如孺子然鄉
黨稱孝焉辛未太恭人八袞率家人上壽觴甫行
而疾作生萬曆己未八月初四日卒康熙三十年
辛未二月二十九日得年七十有三所為詩有居
巢使越嶺南諸集藏於家元配李氏繼許氏又繼
王氏皆前卒治行先後相望而王相公最久子女
皆其出子男子二人允勗歲貢生允昱兵部職方
司督捕主事子女子一人適子姪啓浣前卒孫男
二人履乾履坤曾孫男一人崇勳系之銘曰

文足華國武能戡亂逸氣卓犖丰容魁岸夏屋之
封彤水之畔生氣如存千秋遐算

誥封戶部廣西司郎中貞文龐公墓誌銘

公龐氏諱克慎其先延慶州人隸大寧衛軍籍明
永樂中以衛地賞邊人內附者徙屯畿輔郡縣始
祖永資以百夫長受田河間之任丘縣遂為縣人
三傳至松壽一百一歲稱百一公是為公曾祖生
泮官東光縣教諭泮生招俊諸生兩世皆以尚書
名其家是為公祖父母曹氏有大節死崇禎壬午
之難公始為諸生哀籲當道得上聞列祀典公天

性至孝友于兄弟將析產盡讓膏腴不取而自擇
其磽确者旨甘之奉則身任之不以責兄弟至於
罌葬之禮亦莫不然宗族鄉黨歸義焉公家世受
尚書著尚書傳習錄及藝苑歸約諸書迄不得志
于有司以諸生終老子建寧君塏康熙乙卯舉鄉
試己未登制科入翰林公以 覃恩誥封徵仕郎
翰林院檢討已建寧君改官郎署公再以 覃恩
誥封奉政大夫戶部廣西司郎中乃一解顏謂建
寧君曰吾老子縫掖今乃榮梯再命無以報 國
恩小子勉之以清律己以慎勤服官所以報也歲

戊寅君以久次出守建寧便道過家公勗之曰專城之任可以有為為政非難清靜為上拂百姓以從己欲不可違道以干百姓之譽亦不可潔身奉公盡其在我而勿計得失如是而已君之得建寧也聞有大吏素不喜文士比至果相杓鑿甫二載竟以計典齟齬去官辛巳歸里公怡然曰吾不憂汝以墨敗行而常憂汝以直賈禍今以微青歸田里幸也是時公年八十有五矣明年十月朔示疾君兄弟請延醫弗許曰老當歸耳勿以湯液苦我以十一月朔寂然而逝距其生萬曆丁巳得年

八十有六元配邊贈宜人繼王封宜人子四塏即建寧君前翰林檢討戶部郎中壩庠生爾璽選拔貢生候選教諭皆太學生女三適邊之鎮李鈺邊之基孫男四錫禎錫祥錫祚錫祺公行為國紀學為人師為里鄙矜式者數十年及以耄耋考終下至田夫賈豎皆出涕相弔私謚曰貞文先生以癸未二月某日葬于某阡建寧君書來速銘銘曰襄陽耆舊漢有龐公屏居漢沔心寄冥鴻孰拜牀下鳳雛卧龍歷千餘年公繼高蹤遺子以安世仰素風眉壽大耋逍遙令終問誰與游桂父赤松

吾丘之原高碣穹窿松耶柏耶衛此幽宮

誥贈奉直大夫陝西寧羌州知州慧先石公

墓誌銘

石先生歿五年而其子平涼太守曰琮始登進士
又十年以覃恩追贈先生陝西寧羌州知州曰
琮將以康熙四十四年冬十二月祔母張太宜人
於先生之故阡來徵銘於是距其葬十有九年矣
先生諱顏字慧先其先棗強人始祖獻明仕至汝
寧府知府徙居長山曾祖朝陽祖如金父載勛皆
績學不仕先生少而食貧拾橡負薪讀書不輟屢

遭父母繼母喪蔬食水飲緇衾複衣飾牆置嬰舉
無敢略若自忘其貧也故君子以為難先生既不
得志於場屋而有子曰琮幼敏於學先生身教之
指授為文之法闡明經書奧義晨夕忘倦久之遂
成名士洎曰琮舉省試舉禮部而先生已不及待
曰琮言之則淚下承睫恫乎有餘悲焉先生正直
坦白口不言人過而急人之難甚於己私家無僮
石之儲遇無告者輒推解如不及故鄉里敬愛之
安貧樂道不戚戚於貧賤不汲汲於富貴可謂居
易俟命之君子矣既歿神降於庭自云為神於淮

北之桃源事頗涉怪異然韓子作羅池廟碑述柳侯之言曰吾死為神後三年為廟祀我館我於羅池君子不以為誕先生天性正直好為德於鄉里殆傳所謂歿而可祭於社者於理宜可信卒年六十有四元配孫氏繼配耿氏皆以 覃恩贈太宜人繼配張氏而曰琮孫出也張太宜人撫育有恩自授室以逮服官顧復教誨靡不至曰琮知新鄭縣清勤為中州第一五年之內累膺 朝廷異數峻擢知大郡蓋張太宜人母教為多男子四人曰琮康熙辛未進士陝西平涼府知府加二級曰璟

曰玘曰璐皆貢監生女子四人適王履吉崔琨孟銓鮑翼孫男三人聲宏歲貢生天爵天祿皆貢監生孫女七人曾孫一人曾孫女二人銘曰
不於其身於其子孫綸綍煌煌賁於墓門譬豫章千尋厥有本根譬彼方流厥有璇源維萬石之源
詒爾後昆

帶經堂集卷八十五

帶經堂集卷八十五

請國外員

十善源亦本林學林方流烟

不為其便方其

三溪十八人

天

王

帶經堂集卷八十六

歙門人程哲校編

新城王士禛貽上

蠶尾續文十四 墓誌銘

誥授中大夫福建提刑按察使司按察使清

止趙公墓誌墓

康熙三十八年六月春坊贊善趙君伸符以書抵
子曰從祖父清止府君葬有日府君病且革治命
乞先生銘隧道之石今既八年矣敢請昔公之歿
予在京師未及哭寢門今贊善君將治命鄭重千
里以書相屬不佞其忍辭乃据贊善所為行述序

而加銘公諱進美字巖叔一字韞退號清止其先
蒙陰人始祖平徙益都始卜居顏神鎮七傳至龍
溪公課皇贈中大夫陝西布政使司叅政公之
祖也父暨垣公諱振業中明天啓乙丑進士仕爲
御史累官江南布政使司叅議誥封中大夫陝
西布政使司叅政母李氏封淑人公幼具夙慧讀
書有神解帖括之暇輒私作爲詩歌古文人稱聖
童十四補博士弟子十五學大就自左史兩漢唐
宋六大家之文皆已窺其堂奧發爲文章老師避
席十七中崇禎丙子鄉試第一又四年庚辰成進

士授行人奉使江西寧益二藩府值甲申之變僑
居金陵轉徙吳江之汾湖順治乙酉亂定北歸會
世祖章皇帝下詔直省撫按薦舉地方人才公在
舉中召授太常寺博士博士冷曹無所短長而
公負文章盛名都人士負笈從游甚衆今大學士
宛平王公故吏部尚書謚恭定霸州郝公皆高第
弟子丙戌充順天同考試官得金侍郎鉉李學士
昌垣等六人庚寅以才望推擇爲刑科給事中公
居言路不爲矯激不樂彈劾立言本經術務持大
體若北郊奉配及籍田祈穀諸典禮皆所請也

辛卯頒 詔山西癸巳遷戶科右給事中甲午轉
禮科左給事典湖廣鄉試得程飛雲歐陽鼎等
多奇偉之士丙申出為江西按察司副使分巡湖
西道江右新附吉安之永豐及臨江之新淦峽江
贛之興國素號盜藪公刺姦發伏得其要領言于
巡撫張中丞朝璘盛兵扼賊要害而馳檄招之賊
倉卒遽降乃官其酋長數人解散其衆未幾海寇
犯江寧沿江皆纂嚴彭蠡以西人無固志守令
以下請為備公曰海寇之不能飛渡彭蠡明矣顧
山賊乘間虞竊發第防之乃陰部勒將士不數日

賊果寇永豐公日莫聞警夜遣兵赴之戒以詰旦
破賊明日合戰大敗之禽其魁得前降酋官南昌
者交通狀馳白巡撫悉斬之會江寧圍不解巡撫
徵諸郡兵戍湖口公慮吉安空虛而興國賊未被
大創勢且與永豐新淦峽江餘黨合奏記南贛巡
撫蘇中丞弘祖請發勁卒五百人順流趨吉安至
之明日興國賊千人掠廬陵之富田殺一巡檢僚
屬請往援公不聽曰是將走永豐山中耳命偏將
將贛兵入山邀之行烏道三日果遇賊乘曉霧薄
之賊出不意大驚潰顛墜崖谷禽斬亡算盡奪其

俘獲於是興國永豐新淦峽江四縣賊次第悉平
初贛江盜賊縱橫殺人于城下白鷺洲既捕獲僂
之矣惟李毛者逸去適安福兵餉三千金被劫江
中久不得盜公偵知李毛匿處密使禽之既至毛
搏顙請貸死願捕諸盜自贖許之與約三日或言
毛黠賊反覆不可信公笑曰是不負我諸君勿疑
三日毛果以主名至悉按捕就誅既而毛請問曰
不殺盜魁後恐滋蔓奈何公問誰也曰南贛營裨
將郭某也公密遣壯士數輩易服入贛州禽之于
家而先以書上蘇中丞謝越境之罪一軍皆驚卒

無敢譁者公訊得實按誅之於是贛江無盜患張
中丞上公功于 朝方議內遷卿寺而賊帥萬雲
龍者前攻破吉水新喻二縣既獲復逸坐是奪公
俸越二年弋獲于粵而內遷之議遂寢庚子轉廣
東布政使司叅政分守左江道甫抵肇慶防兵以
缺餉大譁公單騎至其營諭禍福衆遂定會藩伯
缺督撫將以屬公公念父母老矣亟圖北歸省覲
力辭以齎表請行而左江道尋裁去里居侍養者
五年乙巳起補陝西布政使司叅政分守關西道
駐鳳翔鳳翔故有蘇公東湖爲八觀之一公日嘯

咏其間務與民休息尋復奉裁遂里居養親不出
叅政公與李淑人年皆踰八十考終公執喪盡禮
甲寅滇逆發難閩粵繼煽動公慨然曰此豈臣子
避險辭難時耶出補江南江鎮道叅政改浙江之
杭嚴會軍前題補有人丁巳改河南布政使司叅
政分守河北道是時大兵四出彰衛懷三郡當子
午供億紛然公夙戒儲侍民不知勞戊午 詔舉
博學鴻儒內閣首推薦公徵詣 闕公自惟宿素
恥與後進爭尺寸卒報罷歸巡撫董中丞國興重
公為人恒稱先輩不敢齒屬吏也署臬司事安陽

民受僞劄株連甚多公當其首罪全活者三百餘
人壬戌擢福建按察使閩當叛亂後大獄旁午公
晝評囚夜定爰書三月囹圄一空獄無冤濫閩人
歌舞之護巡撫篆寬大有體而金侍郎來為巡撫
公謁之外語不及私甲子引年乞骸骨遂致政歸
歸治園亭于城東之秋谷丘壑勝絕泉水遶舍下
幅巾藜杖相羊其間如是者八年以康熙三十一
年十二月初五日卒于里第得年七十有三配張
氏贈淑人前總督宣大兵部尚書張公曉之孫靜
默有壺德以順治十六年卒吉安官舍年三十有

三十五
六與公合葬虎山之阡葬之日康熙三十八年己卯九月二十四日也子一作謀官監生候銓國子監典簿前卒女子二適翟恂呂炯孫一執璲官監生公少爲詩清真絕俗得王子孟之趣使江西時尤刻意二謝其放吟一卷皆樂府詩丁明末造多悲天閔人之思顧盼跌宕不主故常有邯鄲生天人之歎丙戌後官京師與龔芝麓尚書曹秋岳侍郎諸公倡和一變而高華尚聲調然梨花楓葉諸篇風致不減青丘海叟使楚一集尤爲菽林所貴重江西以往浮湛監司者積三十年公旣倦遊而筆

墨亦奇減早通二氏之說髮未燥作瑤臺夢立地成佛諸傳奇論者謂不減張小山貫酸齋云公清癯如不勝衣雙瞳碧色吐納無俗語一爲諫官斥而不復世皆惜之其斥也或云以黨論故公終不自言子亦不欲顯言之也系之銘曰

公之早歲爲真名士綜敘九流沈酣六藝公之中年爲真諫官衆皆毛鷲我乃龍鸞坐鎮雙江折衝千里緩帶輕裘似羊叔子角巾東第飛蓋西園圖畫屏風似白樂天公之出處如雲舒卷貞觀丘壑孰云軒冕瀧流舒舒顏山叢叢於萬斯年奠此幽

宮

誥授朝議大夫貴州布政使司叅議古愚勞

公墓誌銘

公姓勞氏諱倣融字卷星別字古愚嘉興石門人
 其先世受封於勞山因賜姓晉功曹夷與王謝蘭
 亭之稷宋兵部尚書修策勳南渡迨元有原誠者
 官崇德州學錄家焉即今石門縣也數傳至珩珩
 弟玘明成化朝官給事中以直諫忤旨自珩以上
 世居洲錢里珩子經贅安坵里遂徙居之子鈇鈇
 子源源子王事贈福州府知府子金粟公諱永嘉

累仕至山東布政使司左布政使金粟公三子公
 長也母張氏封恭人生母高氏公少事父母至孝
 與弟倣高倣朗相友愛叔早世公與仲兄弟皆年
 臻八十歲時伏臘冠婚祭祀兩老人必身先之鄉
 里以為典型少為文章高古不諧俗申酉以後罷
 制舉力為善於鄉先是崇禎壬午浙西大侵斗米
 至白金四錢漕不及額公率兩弟括倉庾得米八
 千餘石盡輸之官補一邑荒缺無徵之數全活亡
 算內外嫻黨待以舉火者尤眾無德色居恒教子
 以文行輒舉金粟公遺事為訓子通政君之辨甲

辰登第改庶吉士歷戶部主事員外郎禮部郎中
公誠之曰若攻苦歷幾寒暑以有今日他日儻司
文枋慎毋遏抑孤寒昧本來面目乙卯通政君主
江南試公慎自矢得施震銓等六十三人皆宿素
知名之士丙辰以僉事出督山東學政益絕苞苴
拔寒畯會有減額之令凡繩樞甕牖久淹場屋者
一時題拂殆盡其最知名如汪灝趙執信馮廷櫬
畢世持張埴趙泰牲輩不可更僕數論者謂本
朝四十年來視齊魯學者前有戴京兆京曾施侍
讀閏章與通政君鼎立而三而通政當減額之日

所為尤難會魏敏果象樞為御史大夫毅然以揚
清激濁為己任特疏薦學臣二人以風天下之辨
暨江南學使邵嘉也舉朝清議翕然以為允既而
邵君內擢光祿寺少卿通政厯以例遷人多搯擊
公怡然曰小子能得魏公一言足矣內外皆王臣何
擇焉庚申寇孽據滇黔大兵次湖南進勦貴州巡
撫楊中丞雍建以糧驛道請得旨推擇乃以通
政君往時諸道兵雲集黔為孔道芻粟靡屢咄嗟
何辦會有楚米運黔之令自鎮遠至貴陽輓運丁
夫逃斃接踵復議湖北丁夫協運通政君力言湖

北之夫不必派湖南之運可以停無如黔地採買便中丞據以入告楚運遂罷水西為安氏世業康熙初改土設流官置平大黔威四鎮四郡統之額徵秋糧歲四萬石供軍糈滇亂後民流田荒缺額至二萬石有奇通政君力請蠲除中丞疏再上得旨報可先是金粟公在明代嘗官黔其官齊魯歷諸監司洊至藩臬之長歲月益久所至見思至是通政君繼之黔人洎齊魯士大夫皆曰此勞公孫也吾儕乃世食其德蓋公夙昔所舉以為訓者至是乃大驗公慈儉出天性仁義道德不言而躬

行恒揭慎獨二字座隅自言我一生肺腑如雪將易箒子孫環侍惟以忠孝為訓語不及他既歿鄉人皆出涕相弔曰是五十年前助漕活我數萬戶者其感人如此生萬曆壬子六月二十七日辰時卒康熙三十四年乙亥正月二十八日戌時享年八十又四累遇覃恩皇贈朝議大夫貴州布政使司參議元配沈氏刑部德先女白首相莊六十載多壺德娣周氏忠介公順昌女潘氏中丞公曾紘女皆出名家恭人與之雍睦無間言如公之所以友其弟者幼通孝經小學內則諸書曉其大

義教通政君兄弟皆成立生萬曆壬子五月十三日辰時卒康熙二十六年丁卯七月二十四日申時享年七十又六累封恭人子七人祖勳庠生之純副榜之辨康熙甲辰進士由庶吉士歷官通政使司左通政之芳之裕州同知桓太學生之森太學生女子十二人適某某孫十三人曾孫七人系之銘曰

維勞之先以山命氏姚江語溪波瀾莫二逮方伯公其流益沛佑啓後人公實繼志榮期三樂俯仰無愧子爲名卿爲古廉吏公之榮名施及百世特

書堅珉以告來裔

誥封中大夫通政使司左叅議訥菴錢公墓

誌銘

往者通政再亭錢君與予共事西樞每見罪人株連繫累者輒愀然形顏色往往出己貲贖之予心折久一日語君曰公誠仁人長者也君斂容避席曰主臣此家大夫之教也自是略悉尊人訥菴公行事旣而君遷通政再請急歸而訥菴公捐賓客通政君書來使銘隧道之石嗚呼予仰止公舊矣雖固陋無能爲役其敢例辭按狀公諱陞字如卿

一字臣宸晚號訥菴先世自常熟遷太倉州曾祖如山贈太僕寺少卿祖浩川公桓明萬曆己丑進士累官巡撫南贛都察院副都御史所至著聲績載在國史父煖給事中贈中大夫通政使司左叅議有七子公行第三少讀書一過目終身不忘與兄給諫公增及諸弟有共硯之風給諫歿撫其子廷欽如子弟孝廉埴早世無後給諫謂公弟多子宜分嗣公毅然辭曰即如是是利弟之死而自私也卒不應弟臺有外侮陰以己貲營救事乃得解卒不令弟知父通叅公歿後遺券可萬金公謂諸

兄弟曰吾家所不足者非財也悉焚之以彰先人之德鄉人誦義焉親黨故人以緩急告輒厚伙助之族人或貧不能葬者倡為義冢以免暴露家世鼎盛足跡不至長吏之庭州守白君登明循吏也待公以國士終不往見給諫居要路或干以請託正色拒之晚歲仲子通政君給事西掖季子廷銓登進士第守之益力公持身清峻而撝抑如布衣單門晚進與講鈞禮諸子既貴恆以盈滿為誡以恩讎報復為可鄙有受恩颺去者卒善遇之其厚德如此通政君為諫官則述中丞通叅二公家訓

訓之曰毋黷貨賄毋徇情面毋植黨私在西樞勉以寬恤註誤可贖者贖之故通政君令富陽以清白著聞官門下以忠直重朝廷佐西樞以哀矜恩及繫囚皆公教也公好山水尤嗜讀書晚結茅三楹曰靜逸聚書萬卷手自較勘嘗一至富春窮嚴瀨釣臺之勝汎新安江而返癸酉夏吳中大旱公日從州守步禱因致疾通政君在京師聞之請急倍道歸歸三日而公歿遺言以讀書砥行毋交匪類以隳家聲為訓歿後異香盈室嗚呼公從衆香國中來者非耶生以萬曆丙辰五月十九日亥

時卒康熙三十二年十月十三日酉時得年七十又八 誥封中大夫通政使司左叅議配楊氏 誥封淑人子男子五人長鏞庠生次即通政君晉錫累官通政使司右通政廷銓康熙戊辰進士敷錫歲貢生子女子二人一適盛芳節孝被旌一適太學生吳隣孫十三人曾孫八人銘曰 婁江之錢肇自海虞奕奕中丞為國璠璣詒厥孫謀播穫菑畲造次仁義被服詩書謙尊而光卑不可逾教子一經承德用譽門施棨戟轂列丹朱天道福謙影響不誣勒銘堅石永懷德隅

授文林郎翰林院編修又樸耿公墓誌銘
館陶耿氏自一白先生明登弘治丙辰進士官監
察御史抗疏劾逆閹劉瑾直聲震天下累官江西
叅政曾孫樸公先生如杞復登萬曆丙辰進士官
遵化監軍副使不拜逆閹魏忠賢祠為奄黨劉詔
所劾逮詔獄累官山西巡撫都御史祖孫相望於
百年之間事具國史而二公干支科第無一不同
故海岱間言忠孝清門必以耿氏為稱首中丞公
子含光官高密訓導實生翰林編修願魯字公望
亦字又樸生有夙慧襁褓中已識意馬字四歲讀

韻書六歲通經史八歲學右軍書十歲能文章十
四補諸生十九以康熙丙午領鄉薦庚戌舉禮部
賜進士出身初 廷對擬一甲第三人以一字
之誤置二甲改翰林院庶吉士尋授編修公白皙
眉目如畫朗然玉山之照人又善詩工楷法尤精
國書館閣諸老交引重焉癸丑為會試同考官
力絕夤緣焚香籲天期獲奇士以報國首得韓公
莢為冠冕已而狀元及第官至禮部尚書餘如徐
君倬董君閻繆君錦宣輩皆詞林眉目一時推公
知人不減唐之陸宣公宋之歐陽子也未幾假歸

侍司訓公三載會朝議復設詹事府群公寄書
敦迫以謂馮翼孝德之選無踰公者且年未三十
詎可以丘壑終耶司訓公力趣舍人束裝公輦感
就道非其志也亾何丁父艱歸服闋補原官倡二
三同志爲詩社益講經濟之學未幾而病語所親
曰吾所患惟六月過此無慮矣果以六月九日卒
於京師實康熙壬戌歲也距其生順治丁亥得年
僅三十有六公性至孝六歲生母張孺人卒哭之盡
哀丁未公車忽心動急治裝歸而母蔣孺人病革
人歎其至性里居扃文社手爲丹鉛後進多依以

成名爲詩秀發如初日芙蓉自然可愛有韋齋集
七卷配蘇氏 敕封孺人子男子四人朋舉雀舉雁

舉昆舉子女子一人壻任偉昉孫男六人夢齡嵩
齡壽平夢平夢賚方平朋舉等以康熙四十四年
十一月二十四日大葬公於郡城西之先塋銘曰

漢唐百六金虎宮鄰明社淪胥亦維寺人嶽嶽耿
公世濟忠勁獬廡觸邪繫其天性鍾及文孫芳蘭
猗猗香難久居秋風悴之天名修文地理玉樹游
戲人間電光朝露射書臺畔衣冠所藏卜云其吉
終焉允臧

無為州同知黃先生墓誌銘

門人國子司業黃君叔琳躡予門而謁曰叔琳無似少無師惟先祖是師凡四子五經之書皆口授稍長旁及春秋內外傳史漢唐宋六家之文率手錄為之音訓以授不肖自童子迄弱冠未嘗須臾離也而今已矣惟夫子之言質而可信敢以請予與司業有一日之長誼不得辭公諱爾悟字穎之別字因止其先青州樂安人始祖成以軍功官蓋州衛百戶隸籍焉數傳至廷美有二子伯良廕萬曆己酉舉人知蔚州仲善廕公考也二公俱以中

丞公爾性貴 皇贈通議大夫巡撫陝西都察院右副都御史公之少也值明季喪亂流寓登州之寧海又徙濟南始授書中丞初仕為漢中府通判公侍父就養國初中丞以撫定寧夏功 世祖章皇帝特簡陝西巡撫已而選內外大臣子弟補環衛公與焉尋出為沅州同知年纔十九至即攝州事遭城陷被急縛賊將剗刃不為屈夜半忽有人陰脫之問之曰州民某荷公恩德故冒死來出公于難遂跳而免走軍前請大兵恢復丁父艱服闋補同知無為州築泥汙河堤上下四十里役畚鍤

者萬人爲之較遠近均勞逸功成而民不病迄今
利賴之州人刻石頌德視巢篆除耗羨禁漕費廉
民疾苦而噢咻之請于督學御史增童子試額士
皆鼓舞興起於學會大旱步禱而雨人以為神尋
請歸養而中丞亦予告一門之內融融如也怡怡
如也晚歲杜門息機課諸孫丙夜不倦一步趨一頓
笑勿敢苟也叔琳既以康熙辛未 賜進士一甲
第三人及第公勗之曰小子荷 國恩登上第爲
文學侍從資以進學可也勿矜己而凌物勿自滿
假而怠於學性儉約耽禪悅衣粗食淡終身不改

其素與人交已然諾自湖南將奔喪太原人馬舜
中者贈以金始得歸後訪其家而馬君已前歿登
堂拜母倍償其金而去庚辰九月始得疾將易篲
索筆書無罣礙無恐怖六字洒然而逝生崇禎四
年正月十四日卒康熙三十九年十二月初九日
得年七十配李氏 勅封安人子一人華蕃官大
城縣儒學教諭 勅封文林郎翰林院編修孫五
人叔琳即司業君叔琬順天府庠生叔琪貢生曲
周縣儒學訓導叔璫康熙己卯舉人叔瑄曾孫一
人元錦叔琬出也銘曰

生亂離享大年詩書之澤以啓後賢高原膺膺松
柏丸丸過必式焉曰京兆之阡舉人林曾銘
敕封徵仕郎翰林院檢討玉峰李先生墓誌

銘

翰林檢討孫君勳遭其本生考李府君器予往唁
之其容深墨充然瞿然杖而後能起予驚曰嘻其
甚也吾子之育於孫亦已久矣檢討泣而對曰勳
也天下之鮮民而無告者也生我成我恩則均也
昔者欲返吾本而未忍遽也今已矣予聞之孔子
射於矍相之圃使子路出延射曰賁軍之將亡國

之大夫與爲人後者不入夫爲人後古聖人所不
禁顧不得與於鄉射之禮何也仁人孝子之心必
有所怒然而難安者矣今檢討去其所生而育於
孫一旦遇大故不得爲喪葬主於其心有怒然者
宜其毀也已而本生妣張又卒檢討述其行泣求
誌隧道之石子哀其志爰序而銘之君諱文科字
玉峰其先婺源人始祖實遷長洲之王埭王父奉
父霆君於霆爲次子少爲儒值天下多故遂廢書
一日避兵出走前阻水旣渡同行者將斷其梁君
曰若是是委後來者虎口也力持之梁得不壞僑

居崇明與帕首袴鞞者游其部下有淫掠者誡之
皆驚伏或見被掠者輒傾橐贖之亂稍定歸郡偶
過閭門拾遺金坐待移日遲其人還之而二子勸
勸皆幼慧讀書元妙觀中德州孫公書臺罷長洲
令居吳見勸器之曰是兒不凡謂君曰君多男吾
子踰壯無所出曷乞是兒為吾嗣孫君生之我成
之不亦可乎孫公廉吏有善政於吳君不忍終拒
遂許之君念子幼稚乃攜其家至安德寔康熙丁
未歲也檢討以辛酉領山東解第一乙丑捷南宮
入翰林君老田間衣大布之衣時與鄰曲故舊話

桑麻卜晴雨為樂二十七年 覃恩君以例移封
為徵仕郎翰林院檢討妻張為孺人孺人籍太倉
州有婦德少食貧躬紡績以教子既貴無態色君
以四十二年八月就養京師十一月二十三日卒年
七十七孺人後君厯六月以四十三年四月十二日
卒年七十六檢討嘗典福建鄉試君告誡甚至檢
討奉之唯謹故公明為直省之最檢討以所後有
子將疏請復姓君持不可乃已歷考君生平行事
蓋仁人也質直而好義者也其克昌厥後固宜子
男子四人勸早卒次勸即檢討次勸次劬子女子

二人太倉陳某德州宋來會其適也孫男七人于
盛壬午舉人于寧于益于謚于盪于盩于監孫女
六人曾孫一人蘭孫檢討將以某年月日合葬於
某阡銘曰
橘踰淮兮化枳猗仙李之盤根兮維君有子莪山
芾蒨于廣川瀾瀾何必故鄉兮五湖之涘柏為鬼
庭兮神其棲止萬祀千秋于君蛻在此

待贈文林郎翰林院庶吉士仲弢何公墓誌

銘

君何氏諱毓光字仲弢別字魯齋吾邑多著姓而

家法首稱何氏何之先棗強人也有古用者始著
籍新城數傳至永壽永壽生坤坤生國鼎字中含
與弟國楨皆以文行重于鄉鄙君中含先生次子
也少與兄觀光齊名號二何南游武林武林老宿
皆折節下之歸而以文受知邑令馬君孔懷學使
者楊君毓蘭咸期以國士既數踏省門不遇而君
有子世璣幼有聖童之目以甲子冠其經人謂君
績學力行坎壈諸生間不于其身而于其子造物
者豈無意乎而君志迄不衰鍵戶佔畢不改儒素
丙子受知臨朐令張君曾裕張君浙西名士得君

三五九孝
文擊賞薦領解額尋以一字之誤見擯于主司張君至爲扼腕流涕於是距甲子十餘年矣而君志終不衰然終亦不遇也豈其命耶先是何氏族姓繁中含先生兄弟有憂之於是有睦族之約著爲家訓擇族之老成忠信者爲之長撻罰慶賞仿周禮族師黨正之法少長服教卒爲仁里君兄弟寔左右之縣大夫聞而歎曰盡如何氏邑可臥而治也至今言家法者宗焉君事親從兄終其身內外無間言撫孤姪世琳尤有恩給皆可書元配李氏兩浙運副鴻雷女生於貴介而荆布提汲有桓少

君之風事父母君舅君姑盡孝姑孫母葉皆病往來兩母間視食嘗藥不敢言瘁以勞致疾先其母數日卒宗族稱孝君卒于康熙乙酉閏四月初九日得年五十有九李孺人卒于康熙辛亥十二月二十五日得年二十有五繼王氏子男子三人世璠甲子科舉人內閣中書舍人改署莒州學正世瓚庠生世璿子女子二人適張慶丰焦汝舟孫男四人體仁秉義崇禮綜智孫女二人曾孫女三人以其年十二月二十二日合葬於孝水之南阡蓋君歿四載而世璠登己丑進士第入翰林爲庶吉士

三十五子
銘曰

老驥伏櫪志在千里志士暮年壯心不已無嗟不
遇匪喬伊梓汜鄉之後將復其始

勅授徵仕郎中書科掌印中書舍人茂弘蘇
君墓誌銘

蘇氏古重黎之後周有忿生為大司寇邑于蘇城
在鄴之西故蘇以趙郡為望其自充遷武城之鄭
口則自子元始也數傳至朝明生君寵君寵生之
中游太學以豪俠聞南北齊趙間稱黃中先生有
丈夫子六人而中書君最長君諱偉字茂弘一字

濟夫自其少魁梧岸異年十三補博士弟子明年
食廩餼名壓其儕偶康熙壬子以選拔貢入太學
乙卯舉順天鄉試辛未始舉禮部成進士癸酉授
中書科中書舍人順天武闈分考己卯掌科事奉
命典試湖廣道卒于衛輝旅次君之捷南宮也
予實為總裁官榜後識君侷儻奇男子也方期以
遠大敷歷中外投遺艱鉅必有所表見于世或使
居言路陪廷議必能區別是非條列時務不苟為
突梯脂韋之習而不謂其竟止於此也嗚呼惜哉
君居家事父母盡孝黃中先生病革謂君曰吾新

文廟惟明倫堂工尚未訖汝畢吾志君泣受命喪
葬甫竣而明倫堂亦成撫諸弟友愛晰疑送難以
兄道兼師有昔人易衣共硯之風季弟給事君先
以丙辰登第有聲諫垣君之教也君久困公車開
門授徒齊趙間名士負笈牆進率有所成就其子
姪揃染家訓經術通明拔蝥弧以登者項背相望
其分考順天武闈得曹曰瑋為解首明年狀元及
第其典楚試得彭源等八十人多知名蓋君老於
文學故以所學遞相授受見于家庭師友間者彬
彬如此官京師時曹務清簡與翰林素君杜少龐

君雪厓郎中黃君自先諸名流為詩社文譽藹然
家居席黃中先生後千里慕義戚族待以舉火者
甚眾他如立義學造義舫施絮衣棺椁歲以為常
比閭尸祝之君得年僅五十有 階徵仕郎官
內府中書科掌科事中書舍人元配李氏繼配張
氏秘氏治行相望先後如一子男一人廷禮女二
人壻田肇麗張曰銑以康熙四十四年十月
日葬某阡銘曰
五金之精磐郢湛盧鋒鏑乍試龍津已徂嗚呼
其命也夫

九歲能文章出語驚其長老自時厥後試輒冠軍
康熙庚午舉於鄉明年辛未成進士戊寅授新鄭
縣知縣新鄭春秋鄭都邑史伯所謂主芣騶而食
溱洧河雒間巖邑也當滇黔楚粵之衝供億旁午
君裁其浮冒絕額外中飽之弊罷里排陋規芟芻
之需悉照時值令民輸納以抵正供人皆樂於趨
事中州漕米題歸改折定例發帑金采買使里民
運赴水次途遠費繁民病之君自齎帑金豫糴於
小灘水次民不知輓運之勞此其蘇民力之大者
邑多豪猾往往散帖斂錢名曰打網又多竄名院

司道府胥吏歲納班錢橫行鄉曲莫敢詰其真偽
君悉嚴禁釐革邑之水溱洧最大而黃上諸水皆
經城東注于二水故多溝洫以備水旱君躬率遂
師徒旅之屬歲亟修濬隄防民食其利立鳳臺文
會及義學延名士主之以月望集明倫堂與諸生
論文較藝以興文教凡君所措施一本古循吏之
為政不屑時人筐篋刀筆之為故遇旱三禱皆立
應又條其事上之巡撫李中丞中丞通行八郡著
為令甲會李罷去代之者少司寇武林徐公徐與
予同官潔清直諒君子也夙知君之為人與其所

三子九子
以治鄭者既至君上謁待以國士諮詢中州利弊
所急宜因革者君感知己為條上數事如科場房
額之偏枯則均之荒糧清丈之搜索則罷之行戶
之供應則禁之徐公一一見諸施行而民大悅會祥
符令缺即以委君祥符宋京邑地大人眾訟獄之
繁甲於中州吏抱案牘雁鶩行進君五官并用判
決如流水塵牘一清禹州馬相堯者為奸佃訐其
欺隱郡讞沒田於官徐公以屬君君廉其誣力反
之抵奸佃罪如律田得不沒汴人快之稱神明朱
仙鎮水陸都會商旅輻輳勳戚某將壟斷罔利乞

君給帖毅然絕之其不畏彊禦如此辛巳 上命
督撫特舉其屬品行端方者以聞於是徐公首以
君名進壬午遷寧羌州知州寧羌古武都地氐羌
之國直五丁峽南虎豹所窟人民稀少城無完堞
又州并衛學冒籍者多有君不鄙夷其民教之蠶
桑寬其徭役痛絕冒籍之弊羌人漸有起色甲申
四月 特旨超陞平涼府知府莅任甫三月丁內
艱然猶詳請學使者增平涼固原二衛學額各十
二人士民德之瀕行攀轅雨泣者數千人車枳不
行丁亥服闋 特旨起補福州府知府地當省會

三才
訟獄之繁又倍大梁訟師舞文因以為利君甫下車即揭示通衢如狗一情面受一苞苴神明鑒之當令名位不昌子孫不肖臺使而下重其廉正九郡疑獄悉以屬之凡毀淫祠旌節義建義倉禁偽銀公權量除去流犯共應諸政次第具舉閩俗多錮婢有老死不嫁者巡撫張中丞廉知之下許贖之令刁猾亡賴因緣作奸或冒稱父兄者或不持一錢而欲恫喝得女者訛言四起利一而害百於是中丞亦稍稍心厭之委君察其情實君取其刁詐之尤者重治之風乃頓息而善良始獲安枕或

以君強項非獲上之道子獨取此事為時俗娼訾容媚者之所不能為君性甘淡泊無服飾飲食之好冬一裘夏一葛朝饗夕飧一蔬一飯甘之如飴間一設客蔬筍而已常痛怙恃祿養不逮輒涕下如雨父遺田宅悉推以讓諸弟居恒訓子姓曰汝得為清白吏子孫足矣慎勿歆羨紛華夫利之所在害亦伏焉不可不知也君少食貧既達矣而能固窮不改所守故子以為尤難階奉直大夫進中憲大夫歷任知平涼福州二府君生以順治七年庚寅正月二十六日卒以康熙四十九年庚寅二

三月十二
月十一日得年六十有一配牛氏贈宜人子一人
聲宏歲貢生女二人孫二人子遵子邁孫女四人
曾孫一人啓源其孤將以康熙五十年正月二十
六日葬於鮑家莊之新阡來請銘銘曰
飯蔬飲水簞瓢陋巷樂在孔顏而何紛華美麗之
足尚流俗滔滔廉恥道喪彼賤丈夫遑恤官謗重
君潔廉愛君強項是用特書銘君幽壙

文林郎內閣中書舍人管典籍事馮君大木

墓誌銘

康熙庚辰馮君大木卒於京邸予哭之過時而悲

嗣是數往來安德望君之廬未嘗不腹悲也昔秦
少游死東坡先生歎世無復有如此人大木死世
豈復有如此人哉丁亥冬杪其孤炎來告葬期且
請書其隧道之石予方病困甚言念平生不忍例
辭乃伏枕略述君之梗槩而銘之以代楚些云按
狀君諱廷樾大木其字先世萊州即墨人曾祖仲
選祖嘉禎父沛順治辛卯舉人不仕卒君幼號奇
童讀書一覽輒誦於口彊記不忘十五工爲制科
之文五經三史莊騷以下四庫二氏之書無弗瀏
覽於是落筆輒絀其輩行亡敢當者康熙戊午舉

三才
鄉試第六人壬戌 賜進士出身君文詞贍博又
善撫趙承旨書時論以爲鼎望無以喻君會有尼
之者竟寘二甲及館選以名士薦者五十人復不
及君君於是浩然有歸志矣又三年授內閣中書
舍人官閑無事倖直稀少益取古人書枕籍讀之
足跡踽踽終歲不識貴人之門性孤峭益甚而詩
文亦益奇丁卯典湖廣鄉試所取多振奇服古之
士居然楚之雄風也旣撤棘蠟屐筇杖登黃鶴樓
俯江漢之流眺內方大別諸山南望瀟湘洞庭慨
然遠想有詩百餘篇識者以爲騷之苗裔今所傳

晴川集是也尋以次久掌典籍事宅繼母郭憂泣
血三年毀幾滅性人稱篤孝居久之強起補舊職
量移曹郎有日矣一夕與友人會飲邸舍歡甚丙
夜客皆去君始就寢明日日高不起其僕啓戶視
之君卒矣君生平嚶嚶然慕古近狂不屑不潔近
狷與人少可而多怪非其人雖比屋不相往來苟
其道誼契合推心置人腹坦然無機械無町畦而
內行純備潔修自好尤爲士君子之所難獨不能
突梯閃榆以媚世而詭遇耳語云寶劍不可刈非
古鼎不可柱車其所挾持者非也譬輿人造車而

方其輪欲以致千里得乎計倪曰有高世之才必有負俗之累於君益信顧人忌之天亦忌之使之顧頷沒世年甫及艾以死此則太史公所致疑於天道是非者也君之文清迴絕俗歌詩尤超逸似不從人間來予爲刊削存尚數百篇其友人李子田子將謀刻之其必傳於後不疑君卒以康熙三十九年九月十七日年五十有二娶李氏子一人炎今將以康熙四十七年三月三日葬曹村之阡

銘曰

雲中白鶴兮警露高翔下視雞鶩兮爭趨稻梁幽

蘭空谷兮無人自芳葦蒹雜糅兮羅生北堂巫咸上天兮天道茫茫孰分菀枯兮孰辨彭殤文冢幽幽兮上燭星芒嗟嗟馮君兮德音不忘

文林郎陽江縣知縣孫公墓誌銘

予與道宣孫君順治中偕上公車逆旅解鞍篝燈談藝往往至乙夜不休交相得也尤喜其五言閑曠有淵明之風自時厥後宦游南北不相聞者四十年辛巳予取急歸田而君已前歿長子寶仁以狀來請誌君之墓感念夙昔遂如隔世可慨也君諱廷鐸字道宣別號夢果道人世籍益都其居顏

神鎮則自克讓始六傳至延壽稱柳溪公生震官
濰縣教諭二世皆以文定公廷銓貴 皇贈光祿
大夫戶部尚書教諭公丈夫子四曰翊昌者君考
也 贈文林郎陽江縣知縣母孟 贈孺人君生
而秀異不羣時文定以文學為諸生祭酒君繼起
稱二難宗禎壬午甫弱冠後文定舉於鄉名相甲
乙屢上公車不第益肆力於詩五言尤為擅場閉
關諸作非彭澤右丞不足擬也康熙辛丑就選人
戊申得廣東之陽江縣距海三十里東連閩海西
達廉瓊南通交趾北津要戍重鎮建牙兵民錯處

夙號難治君始至值禁海下令遷界瀕海之民流
冗失業君多方招徠勸墾墾開竈復業者萬餘家五
年中墾田至千六百頃有奇復竈田百七十頃有
奇竈戶八百六十丁有奇縣舊無赤曆糧多飛詭
君考全書刊由單按由單定徭賦吏胥不得上下
其手飛詭之弊遂絕大猾李桃者陵暴一方恃逆
藩為之囊橐前政莫能禽制君急捕獲立杖殺之
豪黠股慄縣有蜚戶以遷界失恒產相聚島嶼為
盜民苦之君力主招撫蜚目石貴等相率歸正復
為良人君本儒者以經術飾吏事而為政嚴明不

三才九子
畏強禦雖漢張敞尹翁歸無以踰之乙卯用兵高涼軍於縣之儒峒時君已內遷猶詳免夫役三千人請准鄉勇三百人入伍支饗省民間供億不可訾計陽人懷之又以餘力繕城郭葺官署闢園種樹吟嘯自適招提精舍竟日忘歸乙卯秋援新例捐納中行其冬奉檄離任戊午秋試巡撫特題留分較文武兩闈蓋君之文學治行有以獲上者如此庚申北歸遂不仕晚嗜傳注之學不復談詩讀吳草廬禮記纂言作敘纂十篇甲子得風疾康熙己卯十月十四日病劇卒距其生天啓壬戌四月

十四日得年七十有八元配宋氏少即讓奩資於幼妹及歸君黽勉有無自安粗糲宗鄙交稱其賢生天啓甲子二月十四日卒康熙辛酉四月初十日得年五十有八男子五人寶仁歲貢生能文工書為青州名士語見吳志太史慈傳寶信太學生寶任業儒寶俸早卒寶佃女子一人適趙蔭萱孫男二人以寧以安孫女六人君所著詩集五卷敘纂十篇藏於家銘曰

泉金書本
粵之封疆弊於驕王君鉏豪強出諸轅牆使冠柱後惠文何減乎河東之二張而乃歸臥丘樊嗒然

坐忘乎

候補主事子青朱君墓誌銘

歷下發地皆泉金膏水碧與湖山相照映士生其間翕清輕以為質煦鮮榮以為詞所從來矣自唐李北海為守太白子美皆來游止自時厥後曾子固蘇子由李公擇晁无咎趙子昂相繼作郡而李文叔辛幼安張希孟李漑之流皆以文章先後鵲起方有明盛時文苑推四傑七子而邊華泉李滄溟實為職志又有劉希尹殷正甫谷少岱許殿卿諸人左提右挈風流文采遂與湖山之勝同在

人口百年已來亦稍衰歇矣吾門朱君子青晚出風流文采獨能自見於當世方期以遠大庶幾成一家之言以繼諸先哲之後而竟天闕以死天實生才而又摧折困阨之如此其有意耶其無意耶於是其弟永州駕部兩君以狀來徵銘嗚呼吾烏忍不銘子青諱緇別字椽村總督閩浙兵部右侍郎厚菴先生弘祚長子也少負逸才自六經三史四庫七略旁及天官壬遁之書無弗習顧薄科舉程文以為不足為而獨致力於歌詩其為詩義兼騷雅體備文質幹之以風力潤之以丹青彬彬然

三石九字
近代一作手也子青既盛有時名四方勝流名士
過歷下者攬湖山之秀挹泉流之潔而未識子青
則猶以為未足也必停車結駟而造焉所居有雲
根清壑之堂楓香之閣花竹窈窕房廊靚深群賢
翕集更闌燭跋筆墨橫飛說者謂金粟道人玉山
雅集而後世無此樂三百年矣自有子青湖山若
增而秀泉流若增而潔而今已矣斯亦湖山之不
幸也子青買田橡村其地在繡江之濱百脈之泉
周於舍下羣峰環抱清暉娛人鹿柴牛宮魚牀蟹
舍謂異時將老焉而竟亦不能待也子青天性純

孝又耽尚丘壑既連不得志於有司則循近例入
貲得授曹郎家居不入仕者十年日侍兩親寢門
雍雍如也庚辰司馬奉 旨分督河工歿於 王
事子青戴星而往扶襯以歸器葬如禮頃之母王
夫人病時兩弟皆遠宦子青侍疾無漏刻去左右
迨王夫人既葬而子青以積毀積勞病不起矣人
亦有言文人不護細行若子青篤於人倫信於朋
友言行相顧內外無異詞不為千古文人一洒此
恥乎所著雲根清壑楓香觀稼樓諸集合詩數百
篇皆予所論次歲乙酉予有安德之役憩子青桐

三石七六
陰書屋者十日日繙閱架上書又置酒邀予游西
郭溫泉汎舟歷下水面諸亭分韻賦詩曾幾何時
而華屋山丘已成陳跡悲哉生康熙九年庚戌五
月初七日卒四十六年丁亥二月初三日得年僅
三十有八王長史云如此人曾不得四十悲哉惜
夫配王氏有子五人崇道崇勳賓理翊典端宙女
三人字李壽淵勞天寵李壽瀟以康熙丁亥年十
月二十九日葬府東鳳凰山北之新阡銘曰
薶玉樹著黃土惟風流文采之未沫兮與湖山而
終古

勅授承德郎刑部浙江清吏司主事銘三何
公墓誌銘

予以順治十二年乙未舉禮部同籍四百人三十
年間迴翔臺閣布列中外者項背相望彈指五十
年而彫落殆盡存者遂不及十人莊生云子惡乎
知悅生之非惑耶子惡乎知惡死之非弱喪而不
知歸者耶雖然死生亦大矣古之達人尚不能忘
情於此故予誌同年銘三何公之墓而不知涕之
何從也公諱訥銘三其字一字公韓世為蘇州崑
山人曾祖天衢貢士官淮安府學教諭孝行載郡

三十七六
誌祖其智諸生父爾昇貢士薦舉賢良母歸孺人
夢麟而生公少為名諸生中順治十一年甲午鄉
試明年中會試賜同進士出身授太原府推官
賢良公手書官箴十六字以授公曰戴星視事指
水明心官品一朝人品百代公頓首受命榜諸座
右出入誦之應州知州某以傲忤上官論劾獄具
矣公憐其無罪原之平陽人被盜胫篋而疑其叔
叔寔人且無以自明而姪巨猾也與舞文吏關通
證成其罪制府下公覆讞得其情力平反之未幾
獲盜時武定李文襄公為巡按御史雅重公俾從

按諸郡有疑獄輒以屬焉署太原府事清白著聞
十七年庚子充武鄉試同考官是年大計吏舉卓
異會江南奏銷事起公名注籍中去官文襄泊制
府白公如梅將合疏題留公念父母春秋高急歸
養力辭去之日士民遮道攀車百里不絕公歸拜
家慶二親老壽兄弟和樂忘其遷謫小築東河之
偏蒔花藥種松竹為賢良公菟裘地賢良公樂而
安焉丙午丁未連遭內外艱喪葬皆稽古禮己酉
服除同年官京朝者數趣入都公絕意榮名堅臥
不應又十年己未同里葉文敏公司寇相國二徐

三十九年
公復敦趣之又二年辛酉始黽勉一出遂獲牽復
補順天保定縣知縣縣為九河下流歲苦水潦戊
辰秋恒雨西山水溢霸保為壑公胼胝夔垂以為
民先築長堤百里外夜騎而馳馬驚逸墮水幾殆
父老皆為感泣畿內旗民雜處多雀鼠之爭聽者
往往抑民以徇旗公獨矯之設荆條以儆旗人之
終訟者邑賦額纔千七百金歲有逋欠公以其羨
代完正供纖毫不以自私上官稔其廉正屢檄攝
霸州固安縣事治視保定巡撫于公成龍尤深知
之通州有未決大案特以公往與部使者會鞫不

崇朝而案定駕幸畿南駐蹕貓兒灣頒賜
雁脯甲子庚午再為順天鄉試同考試官所拔悉
名士耆宿令保定十三載甲戌始內擢刑部浙江
清吏司主事乙亥遂以疾請急歸時公通籍四十
年矣歸七年考終是為康熙三十九年八月初四
日距其生萬曆庚申二月二十六日得年八十有
一配朱氏封孺人孝慈儉勤與公齊眉相莊如
一日生天啓壬戌九月十三日終康熙三十一年
壬申八月初五日年七十有一公自為誌墓其詞
甚悲子男子四人亮建前卒裒掄皆太學生子女

子三人一適葉滂一適郁世偉孫男六人肇元肇
駿肇龍景濬景萊肇麒以康熙某年月日葬某阡
哀掄書來請銘銘曰

湛盧純鈞光如列星過時而用不如發硎脫匣一
試尚無留行引年拂衣鄉之典型壽考終命梁木
以傾玉山茗苧澱湖渺冥後有圖牒觀吾此銘

勅授承德郎兵部職方清吏司督捕主事蘇
君墓誌銘

濮州有純孝之君子曰兵部督捕主事蘇君君諱
金鉉字耳鼎始祖曰克明三傳為兵部尚書穀源

先生祐與祐同出者曰天民州庠生天民生淞指
揮僉事淞生盍禮部儒官盍生光頤曹州訓導光
頤生埒字如藩君之父也封承德郎兵部職方清
吏司督捕主事母鞏氏子三君長也生而穎異數
歲訓導公抱置膝上口授易即成誦補博士弟子
員試輒第一順治庚子舉于鄉旋丁母鞏艱以孝
聞服闋部銓署壽光教諭壽光古斟灌之國士多
秀異而風習囂競君正己率之為立條約務敦士
行抑奔競正文體會歲歉諸生逋賦者衆縣令請
以君督之君曰某職教士非催科也卒辭之諸生

三万九十四
有鬪爭者夜進縑十五純君力却之而平其訟士
為感泣遷靖海衛教授其教如壽光內遷國子助
教甲子奉 上諭纂太學通志君屬筆為多辛未
遷兵部職方清吏司督捕主事甫匝月即以終養
請告子時為侍郎留之至再不可時承德公年餘
八十矣語不甚可辨惟君能知其意行授杖坐奉
席抑搔浣濯躬為之承德公臥牀上君卧牀下三
年如一日也癸酉庶母劉病歿承德公亦耄且病
君侍湯藥日夜憂戚衣不解帶目不交睫凡一載
心力交瘁竟先承德公二日而歿濮之人皆稱君

為純孝云先是宗人有以良田千畝贈君者君笑
而辭之曰君無傷惠我無傷廉其祖產之在濮者
悉推與兩異母弟自置鄆西田輒又分給之皆先
意承志以順承德公也嗚呼內行如君安得不以
純孝聞哉君生于某年日月卒于某年日月配羅
氏子三人法綽法簡法將以某年月日葬于某阡
法綽千里涕泣來請銘曰
箕山蒼蒼濮水湯湯回環扃秘君焉永藏千秋萬
歲式其閭者必曰純孝之鄉

敕封文林郎翰林院編修前西寧縣行取知

縣任菴王公墓誌銘

公王氏諱鉞字仲威號任菴青州諸城縣人也自其始祖庠居城北相州鎮東巷人稱東巷王家庠曾孫績治易為太學生是為公曾王考太學生通議公允升是為公王考通議生子四其季正議公恢基公考也妣周太夫人正議生子三公其仲子伯兄鏌順治六年進士仕至江南布政使司布政使兩世考妣皆以鏌貴贈封如其官公少兄二歲出應試名輒相亞明季遭世亂公兄弟奉母避地航海至淮安之廟灣備歷艱險逾年移匿山村

夜猝遇劫盜數十人公與從父諸昆督僉僕殊死戰公配隋安人因得乘間扶掖太夫人踰重垣伏山澗以免入 本朝順治十四年舉于鄉明年戊戌中會試己亥釋褐禮部需次當為郡理官時伯兄方宦遊周太夫人雅不喜遠適公決志留養不赴選人歲甲辰伯兄卒官又二年周太夫人歿服除歲己酉始謁選部用新例改知西寧縣蓋自公成進士至是已十一年矣西寧粵西鄙重巒深箐狼狽雜居其俗尚鬼而輕生不習禮讓以器訟為能自公之至摩揉涵濡一革其舊在縣八年訟庭

三五九の
闕寂人嫺詩書民樂有慈母士欣得良師焉未幾
而三藩之難作三藩者吳三桂耿仲明尚可喜三人
者皆故明將歸 本朝皆以功封王三桂王滇為
平西仲明王閩為靖南可喜王粵為平南而可喜
長子之信兗悍有才略以計令左右風可喜請老
而歸王位於之信之信既得位益肆狂悖可喜不
能堪用客金光計上書願歸耕遼陽以避之信既
廷議令之信同徒金光等遂諷之信復歸位其父
而朝議令平西靖南兩王質子風其父如平南於
是平西王吳三桂遂稱兵反事聞 朝廷馳使止

平南靖南俾勿遷時三桂之使日夕在二王所從
與二王反當是時靖南王仲明暨子繼茂已前死
孫精忠嗣王叛應之獨可喜守臣節不變 上褒
異之益重其事權晉封親王督撫以下皆聽節制
顧金光者居中用事久為可喜所倚信益援引市
井亡賴黃掌絲輩布列中外招權納賄易置文武
將吏重失人望又為可喜草密疏發之信罪狀請
以次子之孝為世嗣之信積不平乃佯為不知者
愈厚結其下可喜不察更憐之可喜故嗜利之孝
頗近儒雅顧性鄙嗇過於父於是諸將多歸心之

信歲甲寅劉進忠孫延齡相繼反六月延齡陷梧州明年秋高州之難作未半載之信遂叛降三桂延齡之陷梧州也西寧距梧八十里順流下半日可達梧鎮帥班際盛駐兵水口欲移師避寇公故與際盛善移書極言梧為東粵咽喉無梧是無東粵也將軍今日退一步明日肇慶以東皆不守長驅至會城憂且及將軍室家又云愚觀西兵之來無持久計不過以梧守楊某納款累日運輜重入舟戀棧之情已見不日且西走少需之吾兵大集梧州可復也際盛然之相拒二十餘日賊果退去

如公言方梧州初陷公繕治城守具賊陳四者引軍寇西寧先使謀持偽劄至知有備乃離城三十里屯月峒五日會梧州賊退始遁去公於是以治最膺薦行取明年二月解印行有日矣可喜忽具疏請留行取官公度之信必反可喜不能制苟濡滯則禍不旋踵遂移疾歸越明年之信果劫其父以叛可喜以憂死後之信復自歸本朝為其母所告伏誅人咸服公幾先之哲堅貞之操不啻唐甄濟云公之言曰三藩之遷原其始由尚氏父子釁生姦人乘隙構難閩粵交誼滇黔鼎沸雖釜魚

三十九
檻獸終無能為然寓內財力坐以耗竭非數十年
培養元氣未易復也且彼能作賊者獨三桂爾然
已老第姑徐之更四三年三桂死其他兒女子輩
可折筮使也嗚呼此殆篤論也與公既歸杜門謝
客日督課諸子弟治經生家言有及門者為之講
肄疏示無倦好調恤親族以急來告取之如寄內
行惇篤與物無忤族鄙之間推長德者於公無間
言晚益博綜載籍於學無所不窺歲戊午 詔舉
博學宏詞公名在薦中辭不赴家居三十餘年耽
靜樂善為鄉祭酒所著有水西紀略粵游日記星

餘筆記讀書最殘暑牕臆說朱子語類纂世德堂
詩文集各若干卷以康熙四十一年十二月初四日
卒距其生天啓三年三月初二日得年八十有一
以子沛思封翰林編修配隋氏封安人先公歿子
四人沛思長子也舉丁巳鄉試第一己未進士入
翰林累遷至左春坊左中允兼翰林院編修充
皇太子講官沛懌貢監生候選州同知沛愷甲子
舉人福建漳州府同知沛恂丁卯舉人候選知縣
女二人一適孫溱一適李華之丙辰進士湖廣按
察使孫六人櫟己卯舉人沛思出相本椿槃柯曾

孫三人元烈元勳元煒系之銘曰
不亟叱馭以有親也應變固圉以濟屯也蔑汚後
命以潔身也著公大節世斷斷也銘諸幽宮於萬
斯年不可泯也

敕授文林郎河南偃師縣知縣敬齋張君墓

誌銘

十餘年來邑中士大夫宿素彫落典刑殆盡而後
來英妙射策起家經營四方者尚不乏人乃復厄
于陽九中道徂謝未竟其用如偃師令張君者其
命也夫昔人云人固不可以無年是可為太息者

也君諱朝寀字采臣敬齋其別字九世祖始自棗
強徙濟南之新城曾王考科王考世勳考熠斗世
有隱德生丈夫子五人君行第三少穎異露頭角
與兄朝宗弟朝寵以文章齊名君性凝重簡默事
兩大人至孝進止不失尺寸兄弟間以經術相師
友怡怡如也康熙壬子中山東省試第三人癸丑
賜同進士出身銓授偃師縣知縣偃師古緱氏
河南巖邑也與洛陽壤相錯地號膏腴自流賊陷
洛陽屬邑皆為戎馬之場井湮木刊戶口十損其
八皇清定鼎招集流亡漸復故業然有司率緣

以爲利奸胥乘之私幫雜費至不可訾計中州之民不苦正供而苦私徵君廉知其寔下車悉與革除民困以甦司府胥役以州縣爲奇貨符檄旁午要挾恫喝不盈其谿壑不止君侃侃言之上官無所鯁避自是上役搖手相戒不敢以偃師爲利藪矣公暇進諸生論文較藝慨然曰伊雒之間蒿邛之交古之都會理學淵海也士風奈何不競乃立科條月兩試之優其廩餼隆其體貌士皆感奮自勉于學丁卯張君度正遂以第二人捷省闈自時厥後科第項背相望又立義學延耆宿以訓邑中

子弟絃誦之聲比屋相聞士以不學爲恥有漢文翁高朕之風他如講上諭以定民志省刑罰以致民和減踐更以恤民勞通鹽引以蘇民困方次第舉行而君病矣丁卯秋力疾奉檄爲同考試官矻矻較閱得王君汙輩三人旣蒞事歸病益增劇蓋五日而終偃師人罷春巷哭如失怙恃然其得民心如此君生以順治乙酉十一月十六日卒以康熙丁卯九月十二日得年四十有二配王氏幼而喪明或勸別娶君毅然不可旣歸相莊如賓終身無忤人以君有古人之行生以丁亥卒以甲

寅年二十九繼配王氏佐君官遊以廉潔相砥礪而治內勤儉事君舅以孝敬撫藐孤以恩義時稱賢媛生以己亥卒以戊寅年四十子二人慶麟慶麒女五人以康熙三十九年庚辰十一月二十日合葬祖塋之左銘曰

叢蘭方茂秋霜悴之才豈百里而命止于斯噫

帶經堂集卷八十七

帶經堂集卷八十八

歙門人程哲校編

新城王士禎貽上

蠶尾續文十六

墓誌銘

敕授文林郎行取新野縣知縣寶菴張君墓

誌銘

予家與鄒平張氏世婚姻寶菴君子妹壻也又子從姑之子也少予僅五歲當象勺之年老成凝重已絕遠紉袴之習歲時讌聚所談必道義文章之事又予親串中益友也康熙辛未謁選人來京師連牀情話者兩月未幾除授河南之新野瀕行問

予作吏之道予告之曰不負民即不負國不負國
即不負所學三年後臺諫虛左席待君矣丁丑君
果以治行第一徵赴闕予方日夕望君之至冀
得情話如曩時久之訃聞予然疑者累日悵戚難
抑不禁失聲因歎人世生才不偶而遇合恒難君
才而遇矣用又不盡其才誠天道之不可問者茲
日月有時將葬矣孤秉鐸持狀請銘隧中之石其
何忍辭君諱壘寶菴其字號樵涇世為鄒平人君
早補博士弟子丁酉廩餼於學戊申北遊成均已
酉中順天鄉試癸亥署堂邑教諭乙丑舉禮部

賜同進士出身始祖順傳五世至獻廷公奇策贈
奉政大夫寧武兵備道山西按察司僉事君曾祖
也方伯公諱毓泰明天啓壬戌進士歷官通奉大
夫江西布政使司右布政使君祖也文林公諱景
榮順治乙酉拔貢以君弟墉皇贈文林郎雄縣
知縣君父也母王氏予從祖巡撫應天兵部左侍
郎立宇公諱象恒女贈孺人文林公有子九人君
長也天性孝友其事兩尊人愉色婉容先意承志
務盡力以樂其心洞洞屬屬終身孺慕有南陔白
華之風乙巳孺人卒水漿不入口者三日雞骨支

牀幾成死孝贈公晚邁痰疾君晨昏侍側數年之中不櫛不矧一飯始一飯再飯始再飯閱歷寒暑略無惰志隱憂之誠不祇顧額消形而已故鄉黨皆稱純孝贈公卒君時以計偕在京師見星而行望鄉而哭既就次朝夕孺子泣以未得侍湯藥親含殮為終天之恨枯魚之慕風木之悲有前賢所不及者襄事畢始與諸弟析居田園取其堵者器物僕馬取其老且窳者即線續針燧之微必與弟妹共之居常與諸弟分屋讀書賞奇晰疑自相師友閨門雍睦有易衣共硯之風弟墉以選拔為雄

縣令弟墉戊午省試魁其經自餘諸弟皆齊鑣方駕為時名流微君之教不及此任堂邑任新野諸弟皆更遞省侍不異家塾其治新野也務舉大綱載其清靜與民休息惟去其害馬者而已文學校官諸生允隆賓禮暇日即與接見論文較藝縣故有議事臺傳為漢昭烈遺蹟君增修堂廡時其祭祀創為書院俾士子遊息其中弦歌揖讓秩然可觀癸酉分校鄉闈得李華楊春輩皆中州之選壬申關內飢有 詔命刑部侍郎傅臘塔公督運襄陽米二十萬石往賑之新野地當子午豫楚諸大

吏冠蓋相望兩省車夫數十萬絡繹往來經三月
之久君戴星出入公事濟而民弗病丙子軍興羽
書旁午凡車馬糗糧芻茭屨屨皆咄嗟取辦郡邑
洶洶莫知爲計君獨解俸如期竣事新野之民若
不知有大役者然丁丑春南陽旱議發積穀賑之
飢民急不能待有相聚謀搶掠者君多方撫卹始
得解散然形神俱敝矣遂得怔忡之症會臺省缺
員有旨行取循良之吏以充言路君在選中時
方溽暑抱病馳驅益不可支七月終便道抵里未
踰月而竟不起也悲哉君天質純謹望之訥訥然

如不出諸口而中多倣儻奇偉之畫雖決機應變
必持之以厚德居官六載廉及裘糗惠被鰥鰥叔
敖之復市宓子之鳴琴不足多也乃其可重者尤
在家庭兄弟旣翕以順父母史所書獨行何以加
焉年不及耆位不酬德此予所爲太息流涕而致
惑於天道之有無者也生明崇禎己卯正月十五
日辰時卒康熙三十六年八月初九日未時享年
五十有九娶子妹爲先考累贈戶部左侍郎匡廬
府君次女男一秉鐸貢監生孫男五原冲原澍俱
庠生原清原泌原灝曾孫男一懋綸以康熙三十

八年某月某日某時葬鳳凰山祖塋之次系之銘
曰
讀書而成進士作吏而號仁人顯揚之孝使其親
為君子之親亦可以無憾矣或曰位不配德齒曆
之算反短其身不知有常者天道有誣而必有伸
未盡之業其在君之令子與文孫此理之所可必
也故用以銘大墓之門

勅授文林郎臨淄縣知縣函東楊公墓誌銘
康熙乙亥歲予居京師故人子楊樞楊楫介其宗
人庶常顥以書來乞銘其父文林公隧道之石明

年春予有祭告西嶽江瀆之役入潼關則樞楫儼
然迎道左祀事畢遂過臺頭訪所謂楊子居者公
菟裘也地介二華之間山光林影風氣清曠亭館靚
潔院內海棠紫薇方盛開蓮花玉女諸峰蒼翠落
簷際真隱者之考槃也予旁皇移晷不能去於是
距公之歿已三年矣樞楫再拜申前請王事靡盬
未暇以為既歸京師一載追憶前事感歎者久之
乃敘而銘焉公諱端本字樹滋別字函東漢關西
夫子裔也世家於潼曾祖臣祖時秀潼關衛學生
考筭衛學生國初以次當歲貢辭隱方山之麓號

石隱居士妣周孺人公幼值改革從石隱公居方山受書博綜載籍兼攻詞賦不應制舉戊子石隱公臥疾公潛為文告於關壯繆祠願減算以延父壽居憂哀毀欲不勝器終制出應有司試甲午鄉舉乙未成進士以母老不欲謁選會更寄憑之例按籍銓授壬寅除知青州之臨淄淄故齊都會也昔人謂臨淄之中七萬戶吹竽鼓瑟鬪雞走犬六博踰鞠車轂擊人肩摩自喪亂已來什不存一逋賦至六七年又多流亡輒連及比閭族黨而令終以罷去公慨然曰令民父母也父母不恤子弟又

重困之忍乎哉吾視一官如脫屣耳殘民以逞非所能也於是履畝行勾股法阡陌較若畫一宿賦累民者悉除之丁壯則簡其髦倪悉汰之逃籍之牽連閭黨者除其弊法徭役常緩其期聽民自輸胥吏索羨金者立繩以三尺暇則課民種樹以多寡定賞罰齊都境中多前代陵墓祠廟修葺禁蕪采時其祀事進其士之秀異者興以道藝而殿最之獄囚給以藥物孤寡時其衣食淄有隱者稷門逸棹楔表其閭而親式之淄澠天齊淵諸水皆在縣境欲興水利如龍首諸渠規畫已就會罷去不

果愚谷有祠南郭有泉天齊淵有隙地例有常稅
悉罷之縣署久燬官僦民舍以居將議營建而苦
俸入不給會以直鬻民屋撤其壁得藏金吏以告
公正色曰吾以直易屋材非易壁也悉以金還之
於是廉聲益著而署亦潰於成莅官二載秕政盡
除百廢具舉淄之民愛之如慈母其胥吏豪猾畏
之如神君大吏引重百喙如一甲辰竟以前人積
逋坐累罷官淄人聞之罷市號泣僉謀赴水關籲
留公力止之曰吾有母在今歸依子舍榮於簪紱
勿煩我父老子弟為也以候代客淄者六年淄人

歲時伏臘請謁慰問如家人父子又醵金走二千
里入秦為母夫人壽如是者至再久之巡撫中丞
疏請得復職而公故倦游且以母老亟思覲省遂
拂袖歸淄人祖道者數萬人自淄達濟絡繹三百
里不絕皆流涕訣去縣西故有溫泉涸久矣公至
忽涌出父老言有賢宰則然且兆歲豐也公名之
曰瑞泉自為記公罷泉復涸公既歸淄人思之不
置刻石泉側曰楊公泉歸六年而母夫人以壽終
淄人製哀誄攜雞絮走二千里唁公於家其得民
心至此遂誓墓不出或以為言公曰吏難令尤難

易操非吾志守吾素則前轍已覆奚仕為治小圃
舍南構軒讀書其中自題曰羲皇以上懷葛之民
即所謂楊子居也間日輒躬謁先墓手植松柏裴
回日夕乃返以為常晚撰潼關志簡核有體其兵
志一篇尤可備史家掌故識者謂康對山志武功
韓五泉志朝邑無以踰公也公以孝友居家以忠
厚聞鄉黨而以潔廉仁明著於當官尤其章章較
著者他日良史當大書特書著之循吏傳固不繫
夫名位之崇卑也所著歌詩雜文曰潼水集者凡
十六卷常欲繕寫寄予為論次未果今銘其藏亦

治命也生以崇禎戊辰六月二十三日卒以康熙
三十三年甲戌正月二十三日得年六十有七配
郭孺人汾陽王裔子二樞廩膳生楫歲貢生女子
二適陳綸王佑孫男七兆鱣象鱣法鱣服鱣祥鱣
瑞鱣昌鱣系之銘曰

入為孝子出為廉吏古之遺愛養民也惠二華峒
堯清渭東逝有大鳥止於墓門者曰此關西夫子
之苗裔

景雲 敕授文林郎雄縣知縣石宗張君墓誌銘

鄒平東郭張氏兄弟九人讀書績學雁行而肩隨

三才六十三
如昔所稱荀氏公沙氏者已而長公新野君壘報
最需次臺省病卒季公孝廉墳登鄉薦先卒今次
公雄縣君報最受代有日矣而又卒其卒慘甚論
者皆以為天道不可問靈均呵壁有更端不可殫
者即予亦不能無疑予與君外兄弟也幼相習君
之孤秉鈿等以誌來請詎忍例辭君諱墉號西園
石宗其字曾祖奇策前誥贈寧武道山西按察司
僉事祖毓泰天啓壬戌進士仕至江西布政使司
右布政使父景燦順治乙酉拔貢以君貴 皇贈
文林郎雄縣知縣娶于王前巡撫應天兵部右侍

郎立宇公象恒女即予從姑也有子九人君居次
君風神玉立少讀書家塾與兄新野令寶菴齊名
寶菴先以己酉捷京闈乙丑成進士壬子君始以
選拔貢入太學而其弟翕仲墳蓮岳竣連翩而起
君復與之適軫齊軌文譽益高戊午鄉試翕仲魁
其經君復被落會予官國子祭酒君來肄業成均
為旗下生徒教習乙亥除雄縣知縣雄古易京所
稱燕南垂趙北際者也地當縮馘之口而旗民雜
處尤號難治君固仁人政尚清簡俾旗民不相凌
競有古比閭族鄙之風縣居九河下流衆水所歸

民賴菰蒲龜魚之利庚辰諸淀水涸昔之澤國盡為膏腴民爭趨之或相詬誶君履畝定額紳士編戶較若畫一豪強不得兼并衆歌咏之明年有永定河之役畿內諸州縣丁壯畚鍤勿敢後時君獨力請修縣南堤工是役也雄民獨免徵發縣人德之堤成名之曰張公堤予以辛巳予假過雄二十里間堤路如弦高柳蔭之數十步輒作一橋上通輪蹄下通舟楫風帆往來若歷堂序於是歎君之為政有召杜之風非但以簿書筐篋為能者也癸未以肅清驛站特旨超遷予在京師方日夕企

君至而忽驚聞逆奴之變為廢眠食嗚呼以君之生平孝于親友于兄弟居官則豈弟馭下則寬仁可謂君子善人循吏者也而竟以此終天耶人耶吾不得而知之矣夫光武漢誼主也竇建德草昧之雄也光武至侯蒼頭子密而建德能立誅滑州刺史王軌之奴滑人感動即日而降予嘗讀史而慨然孰謂光武顧出建德下哉 國家法律嚴明立正梟獍之誅稍可瞑君目于地下吾終為天道惜耳君固工文楷書尤圓美秀勁有大令之法夙昔力行功過格好行其德贈公沒與其兄力支門

戶外侮內難卒不得逞事多可書今略其大者俾
 鑿諸隧道之石千秋萬世必有為咨嗟太息而撫
 膺者也君生以崇禎辛巳正月二十二日卒以康
 熙四十二年八月十六日得年六十有三配王氏
 繼配韓氏男子五人秉鑑庠生先卒秉銓庠生先
 卒秉鈺廩生秉鏐庠生秉鑲女子三人一適張億
 維一適畢世推一幼未字孫男三人原澧原澤原涇
 以康熙四十三年十一月某日葬某阡銘曰
 黃鳥哀良人百其身何梟獍肆狂戕厥鳳麟天道
 茫昧孰知往因降祥降殃孰為屈伸長白蒼蒼小

清粼粼秘此黃腸永安千春

太學仲聞趙君墓誌銘

君諱廷講字仲聞姓趙氏世德州衛人資政大夫
 都察院右都御史管戶部侍郎事繼鼎之孫順天
 府通判啓睿之子少聰穎強記年十五受春秋左
 氏傳一過不再讀以蔭入國學例當得官不樂就
 自放于酒葺精廬竹木花石位置楚楚度圖書金
 石文字千卷充牣其中前鑿小沼蓄文魚百頭聽
 堂堂策策以為樂簷戶間多籠語鳥時其鳴則嘯
 而和之尤善吹笛每風清月白輒乘興作數弄有

三十七
桓子野之風性不喜紃綺貴遊獨與二三窮交飲
飲輒醉或風雨客不至獨坐引滿讀莊騷史漢書
醉乃已亦間爲詩有句云達似劉伶因酒死窮如
東野以詩鳴康熙二十三年年三十六以酒死人
以爲讖云君娶于李河津知縣源之女婉嫵有志
操幼從母受書通孝經列女傳旣爲婦雞鳴候寢
門姑嫜宜之姑治家嚴李有子女七人衣食不給
辟糶佐之又不足則脫簪珥質嫁衣佐之伏臘祭
祀賓客宴饗必預爲儲侍君放意于酒不問也諸
子甫勝衣口授蒙求諸書即嬉戲不使傷及螻蟻

其賢且仁如此君歿李事舅姑撫子女盡孝慈之
道後君三年以二十六年九月卒子四人善慶國
子學正時中念曾善述女三人適李蕃田貽麗金
榿孫二人賜書綏遠銘曰

醉之鄉不知其幾千里假道姑射乃至邊鄙遊是
鄉者嗣宗淵明無功追之死葬其壤廣川鬱鬱酒
人之墓有婦而賢百年歸祔

候補內閣中書舍人西峰吳君墓誌銘

君吳氏諱璟字粲玉別字西峰其先平度州人始
祖宣徙東武又遷霑化傳三世至鳴岐有隱德壽

三
登九表鄉人私謚慤毅先生生五子其四曰茂華
崇禎中歲貢舉三子長汝為順治己丑進士知麟
遊縣次汝亮崇禎壬午舉人知江寧縣次汝禎歲
貢生是為君考有子七人長珙辛酉科直隸舉人
君行居三少而天姿沉穎未弱冠補諸生君考以
君能習勤廉幹授家棟焉遂輟舉子業挾策入成
均君傷夙志之未遂也遂遵例以內閣中書舍人
需次旋里長卿以貲為郎雅非所好乃里居未久
奄忽以歿年不配德僅及中壽何天問之難通而
善人之弗獲佑也君平生懿行大書特書皆中史

例最其為人植基長厚煦煦孝謹似牧丘侯家禮
法閨門之內肅若朝典而忠實無他腸又衛建陵
所為六劍盛者也端居若訥訥不出諸口而當大
廷廣衆獨排羣議立劈轆轤無所鯁避有古烈士
之槩壬午癸未間齊魯大饑穀價翔貴青燐白骨
羽望於道路素封之家非昂其直以射倍蓰之利
則扃鐫以自封殖坐視道殣弗恤也君慨然倣常
平法賤售以活鬻桑之衆又計己家口僅留以供
饋粥斥其羨煮糜以濟餓人全活無算是時凶荒
為癘大吏具疏以聞 聖天子特令旗員數百人

齎太倉銀米分路賑濟賑需者爲曹某等五人一日召邑人士會議賑荒方略衆喁嚅莫敢前曹攘臂起曰今日之事有盡者帑金無窮者饑民以有盡供無窮是谿壑也其何能濟計惟以括富民粟佐公家之不足以拯此一方民耳言次鬚髮怒張將劫衆以必從座上相顧失色君抗顏折之曰誠如天使言禍踵至矣天子使公等拊恤殘民耳而比戶檢括是古所云搜粟都尉也豈稱上旨哉且千里大祲富室所餘幾何破一中之產而閭左皇皇盡室逃竄是召亂也是益之凶也饑不

可救漸不可長得毋償公家事乎何如酌金粟多寡按戶分賑可厭衆望而公亦坐收人心計無便於此使者默然氣爲之奪遂止不括富民粟當是時人謂君侃侃數言勇若賁育諒哉有負民計無復之將鬻其妻夫婦對泣悲甚君聞之急調以銀米釋其生離之慘其人泣拜而去及歲稍稔凡逋負者悉來相償君合券而投之曰歲雖小稔吾收若負是再斂也悉折其券而焚之若夫解紛排難拯急扶危頗有魯連風義前令陽羨蔣君天麟以母喪離任爲同僚羈絆不能歸君出粟數百斛助

其交代蔣始得歸潘令儼思坐虧空淹滯君首倡義飲助五十金潘得補官帑而去孫君鼎鉉任某邑令以罪譴戍霑化至艱衣食君資給十餘年免於凍餓其慷慨行義類如此又其大者霑學宮歲久頽敝君毅然曰吾儕託足斯文坐聽庠序鞠為茂草而欲子姓興起奮跡尚何望立出百金躬任督率為邑人倡士大夫感之先後樂輸未期年而潰於成人服其義君居恒約於自奉朴以自持若古賢之狐裘終身弗易一冠十年不改者乃豐於供賓客厚於奉師資君之第四子協札髻鬣以戊

子得雋人以為盛德之報云君天性孝友事親盡色養太孺人老病不任粒食君命其婦乳哺以代食太孺人病良愈君子以為有崔夫人升堂乳姑之風君之教也君與諸兄弟友于無間言後食指繁乃析爨君之第舍完整季宅窳陋君曰吾弟幼不任土木乃相與易之太孺人養老公田盡以讓其幼弟曰吾以承慈幃志也君每思范文正公睦族之義嘗曰吾宗遷霑未久族中皆吾祖宗子姓安可以親疎為厚薄族中凡吉凶禮皆身任之族人

其以命相軋也趨迎傷者於家謹視之卒以無恙而兩姓之忿遂平外而交道中通有無濟緩急以君為歸孝廉李君頌詹學吉津先生之子貧不能赴公車君解橐勸駕癸未遂捷南宮進士房君于泗授楚之湘陰令不能治裝君為廣貸于姻好得五十金以壯其行後房卒于官君聞之即代為償其負無幾微見顏色第憫然曰生於我乎歸死於我乎償義如是也死生何間焉趙生先抃君之中表後輩也家赤貧甫七歲君撫養於家為之延師與諸子同學後補諸生有聲趙每語人曰成我者

吳公也故君之歿趙為之服小功以報君之砥行慕義不為立名而名亦隨之或望廬而息爭或有不善惟懼君之知之也君易箒之頃神氣不亂謂家人曰吾生所為無事不可告人死復何憾但吾家累世忠厚夙有隱德願汝曹似續勿忘吾無事矣昔邾文公之亾也一言而善君子曰知命君之謂與君生於順治十四年丁酉六月十一日卒於康熙四十八年己丑八月二十一日得年五十有三配李氏子男五人怡棠協樞俱庠生懷柯協札戊子舉人懋柱孫男五人坦堅墉圻堦君之孤將

以某年八月某日時葬君於某原繫之銘曰
 渤海偉人負雄略英姿奕奕風磊落排難解紛魯
 連若季布千金已然諾一經式穀早鳴躍群鳳翩
 翩行入洛嗟嗟延陵世增廓

太學生齋如趙君墓誌銘

予季妹之夫趙君齋如以辛巳六月卒於是不佞
 方取急歸臥疴埽軌雖百里而近不獲往訣未幾
 盡急將上京師孤甥執端以其母之命來速銘嗚
 呼予視君十年以長而今乃銘君之墓耶君諱作
 肅子雍其別字始祖自蒙陰徙益都之顏神鎮九

傳至朝議公振業以進士起家官御史終江南布
 政使司參議有丈夫子七人長繼美諸生即君考
 也少為家督精於農事兼習白圭計然之策嘗出
 粟賑飢活千人年四十一卒君少而孤露終鮮兄弟
 十二當父大事如成人十四補博士弟子方讀書家
 塾而外侮叢集會僕區之令甫嚴株連者動至破
 家宵小以君為奇貨勢且岌岌僕楊遇春者毅然
 請代君詣吏撈掠無完膚數瀕於死卒無辭事乃
 得解遂援例入太學尋屢遭大故居母張及祖母
 李淑人祖朝議公器皆盡禮盡哀三載蔬食鄉鄰

稱之其居生母呂喪亦然有姊適給事中孫君蕙
卒猝不及治棺以己所儲佳木斂之居恒事諸父
如父友從父兄弟如同產恒曰吾無父諸父即吾
父也吾無同父昆弟同祖昆弟即吾同父也故諸
父皆愛重之叔父清止先生以按察使家居晚得
疾彌留君侍醫藥衣不解帶者旬月既受遺託孤
怨侮狎至弗爲動也蓋其天性孝友如此義僕楊
遇春嘗周旋患難君授以田養之終身及其妻子
里中兒稱貸貿遷者以數十多負君君一無所較
前後折券至不可訾計顏文姜墓毀君獨修治之

其能爲越俗事率如此自滇黔用兵以來屢開捐
納事例本以佐度支紓民力久之吏道寢雜至有
人奴廝養遽躡方面者君獨恥之弗屑就予恒謂
君此一事過人遠矣君天姿敏慧多才藝然皆不
肯竟學初好篆刻去而學畫尤工窠石間作小詩
亦不省錄存者不及百篇君一子三女二女相繼
卒一孫一孫女又天君鬱鬱發病遂不起年五十
有七狀謂君履順而居逆體逸而神悴信然哉君
娶予妹爲先司徒府君季女子一人執端增廣生
女三人長適孫文定公廷銓孫續端次適章丘謝

僖敏公啓光曾孫兆麟皆前卒三適淄川舉人韓
煊子維堅孫男一人憲聘子姪訓導啓深女系之
銘曰
今之高貲青雲坐致印何纍纍綬若若耶而君獨
邈然而忘世此一節足傳君矣而況其孝友姍睦
之風班諸古獨行而無愧者歟

明經畢君墓誌銘

明有名臣曰太子太保戶部尚書贈少保畢公諱
自嚴歷仕四朝清忠一節學者稱白陽先生先生
有丈夫子三君其季也諱際字字信涉幼以門廕

當得京朝官會鼎革停罷補博士弟子貢入太學
告歸侍母晨昏庭闈絕意仕宦從仲兄通州君後
肩隨跬步不失尺寸有所言輒韋弦佩之晚以田
園授諸子退居東村山重水掩人跡罕至山上有
石方廣踰丈石旁有泉一泓色味清冽取以釀酒
酒輒佳君時策杖裴回其間名其石曰阿石泉曰
阿泉漱流枕石迫然終日因命畫師作逸老圖自
為之記所居筆牀茶竈焚香埽地日危坐讀書履
跡不及城市教諸子以勤儉少保公遺一裘歷數
十年雖敝不忍易也常曰留不盡以還天地留有

餘以遺子孫為諸子擇師必經師名士故諸子多
 以文章行誼著聞於時康熙三十八年十二月二
 十一日卒距其生崇禎五年三月十九日得年六
 十有八君生七歲而少保公歿自悲少孤生不及
 養遺命葬少保公墓側元配李氏故保定府知府
 縉徵子子十人盛鈞盛鎬盛銓盛鑰盛鈺盛鑑盛
 鉞盛誌盛銍盛鈿女十一人皆歸士族孫十五人
 世涓世汶世滂世深世漢世澍世汀世浹世涑世
 沖世濬世漢世濟世灝世沂諸子遵治命以三十
 九年四月二十一日祔葬於黃埠之賜阡為之銘

曰

門施行馬庭有列戟君獨伊何膏肓泉石粲粲門
 子白華朱萼從公地下云胡不樂

待贈儒林郎致政林張公墓誌銘

公張氏諱玳字致林別字漪園其先棗強人始祖
 能遷居齊東著籍焉高祖居錦以孫惟養貴顯贈
 河南布政使司叅政曾祖擢桂祖惟登河南按察
 司經歷父翼飛以歲貢考授知縣公弱不好弄十
 歲淹通經史弱冠為名諸生事親至孝六歲時母
 病思雞跖中廚偶乏公私行求得之以進入歎其

三五七四
至性順治初土寇陷城公方守南門念祖在家急
返負祖奔避為賊執矢刃交下幾斷脰矣瞑眩中
若有人扶掖登東岳廟以免經歷公嘗從容語公
曰吾平生無他嗜好獨好積書種樹耳汝他日善
守之公服膺不敢忘今閱數十年而藏書加富林
木日加葱鬱知縣公既歿母范太君將為公及兩
弟析箸公泣涕不可命至再四乃勉從之已而仲
弟又歿子人文方四歲公撫之迄於成立兩子皆
為諸生其門以內孝友如此外舅績溪令梁公以
逃人誑誤公周旋患難無遺力卒脫其子與外姑

迎養於家既有室而後歸之鄉里高其誼里人有
睚眦之怨反脣相稽公以杯酒釋之率愧服去治
家勤儉昧爽而起子姪臧獲無敢後者布衣蔬食
以為之率幼穉不衣紈綺常戒之曰天地生物祇
有此數暴殄之必為造物所忌但令溫飽足矣訓
課子姪晝所雜誦夜必覆之恒曰汝曹讀書為士
立品務高居心務正勿見小利勿墮大節諸子姪
奉教惟謹皆有所成就孫鐸以康熙己卯鄉舉猶
及見之明年庚辰十二月二十九日考終年八十
有二元配梁氏績溪知縣梁鴻圖女也年十五歸

公婉孌以事姑舅淑慎以閑有家有姑三人皆少
寡終其身慰問餽遺無倦馬氏姑無子女生養死
葬以身任之遠近稱曰禮宗丙戌春及見鐸成進
士以三月十二日終於內寢年八十有四子男子二
人虎文麟文皆太學生子女子三人適王永年馬
植尹法皆前卒孫男七人銑早卒鑑廩生鉞前卒
鐸康熙丙戌科進士銓鈞庠生鉞前卒曾孫十四
人思恬思厚思廉思虔思重思讓思誠思進思永
思和思睿思用思齊思聰元孫一人為己公以辛
巳四月初四日既葬祖塋之次而隧道之石尚缺

至是以太君祔實丙戌十月二十六日為之銘曰

維公門閥著於河東維公質行孝慈友恭健順令
德冀缺梁鴻齊眉介壽大耋考終慶及苗裔玉樹
青蔥懿此佳城馬鬣之封以昌後人以維世風

帶經堂集卷八十八

崇熙堂集卷八十八

青嶽總出卦賦馮翊之持以員錄人以聯世風

蘇蘇楚平無極百介壽大壽長壽壽壽及百壽王楙

蘇公門開壽長同壽蘇公贊林孝慈文恭對郎令

王明公大壽林實丙亥十月二十六日壽公銘曰

卷一